

17. august 2007  
11. marts 2007

UKA 2007/12  
UPA 2007/50

## **Inatsisissatut siunnersuummut oqaaseqaatit**

### *Nalinginnaasumik oqaaseqaatit*

#### 1. Siunnersuummut tunuliaqutaasut

Kalaallit Nunaanni tusagassiuuteqarnerup iluani akisussaaffiup qanoq inissisimanagera pillugu inatsit nr. 439, 31. maj 2000-imeersup Folketingimi ataatsimoorfigineqarluni akuerineqartup malitsigisaanik, Kalaallit Nunaata tusagassiuuteqarnerup iluani akisussaaffeqarnikkut apeqqutit aaliangersaaffigisinnaangorpai. Inatsimmilu aamma erserpoq, danskit tusagassiuuteqarnerup iluani akisussaaffiup qanoq inissisimanagera pillugu inatsisaat, Kalaallit Nunaannut atortussangortinneqartoq peqqussut nr. 39, 20. januar 1997-imeersoq atuutiinnassasoq, danskit inatsisaata aaliangersagaannik Kalaallit Nunaanni Namminersornerullutik Oqartussat inatsisiliornermikkut atortussaajunnaartitsinissaasa tungaanut.

Folketingip pisinnaatitsissummik inatsisiliorneranut tunngaviuvoq, 1996-imi Inatsisartut Naalakkersuisunik pisinnaatitsimmata, tusagassiuuteqarnerup iluani akisussaaffiup Namminersornerullutik Oqartussanut nuutinneqarnissaanik isumaqatiginninniarnissamat. Tusagassiuuteqarnerup iluani aaliangersaasinnaanerup Kalaallit Nunaannut tunniunneqarneraniilli ukiut 6 qaangiutereermata, Naalakkersuisut isumaqarput piffissangortoq, Kalaallit Nunaat pineqartup iluani nammineq Inatsisartutigut inatsiseqalernissaa. Ilutigisaanik ukiuni kingullerni tusagassiuuteqarnerup iluani annertuumik allannguuteqartoqarsimavoq, tassa radiukkut tv-kkullu ingerlatsineq pillugu inatsit ullumikkut atuuttoq ammaassimmat, KNR-iinnaangitsup nuna tamakkerlugu radiukkut tv-kkullu ingerlatsisinnaanissaanut, soorluttaaq qarasaasiaq atorlugu paasissutissiiviit arlaqartut assigiinngitsunik imaqtartut siunertaqtartullu pilersinneqarsimasut.

Inatsimmi pisinnaatitsissummi erserportaag, Inatsisartut maanna Kalaallit Nunaanni tusagassiuuteqarnerup iluani akisussaaffiup qanoq inissisimanagera aaliangersaaffigissallugu oqartussaalersut, Danmarkimi Folketingip aaliangersaanissamat oqartussaanagerasuulli, taamaalilluni Inatsisartut aaliangertussaavaat tusagassiuuteqarnermi akisussaaneq qanoq iluseqassanersoq. Aamma inatsimmi pisinnaatitsissummi ersippoq, Inatsisartut malittarisassaliorinnaasut innuttat akissuteqarsinnaatitaanerinit, tusagassiornermi ileqqorissaarnissamat aamma tusagassiuutit pillugit aalajangiisartoqarnermut tunngasut pillugit – Europami Inuit Piginnaatitaaffii pillugit isumaqatigiissutit naqisimaneqanngitsumik oqaaseqaateqarsinnaaneq il.il. pillugit malittarisassaasa iluanni.

Uunga siunnersuummut atasumik Naalakkersuisut isumaliortersuutaat aallaaveqarput, tusagassiuutit akisussaaffii pillugit pisinnaatitsinikkut aaliangersaanerit oqimaaqatigiissaartariaqarmata kiffaangissuseqarluni oqarsinnaatitaaneq, innuttaasut paasitinneqarnissamik pisinnaatitaanerat, oqartussaaqatigiinnermilu aaliangiiniarnernut tusagassiuutit atuuffiat, illuatungaaniilu inuit ataasiakkaat innarlerneqarsinnaanerinit illersornissaat. Naalakkersuisut isumaqanngillat, eqqumaffissat taaneqartut ataasiakkaarlugit immikkut isiginiarneqarsinnaasut, inuiaqatigiinnulli aammalu piorsarsimassutsikkut attuumassuteqarfigisai qissimigaarneqartariaqartut, tusagassiuutit suliamut tunniusimasumik, apersuusersuisumik inuiaqatigiinnilu kiffaangissuseqartumik inissisimasut aallaavigalugit.

Naqisimanerqarani oqaaseqaateqarsinnaatitaanerup ilaatigut imaraa, tusagassiuutit naqisimaneqaratik paasissutissanik pissarsisinnaanerat, tamanut ammasumik allaaserinninnissaq, issuaanissaq imaluunniit oqaaseqarfiginninnissaq siunertaralugu. Kalaallit Nunaanni piviusut naqisimaneqanngitsumik oqaaseqarfigisinnaaneri naqisimaneqanngitsumik oqaaseqaateqarsinnaatitaanerup iluaniippoq, naqisimaneqanngitsumillu oqaaseqaateqarsinnaatitaaneq atortariaqarpoq inuit ataasiakkaat namminiussusiat inuttullu innarlineqaratik inuusinnaatitaanerat annertuumik ataqqillugit, naammaginngitsumillu innarlineqannginnissaat qularnaarlugu. Tusagassiuutit inuit tamarmik oqartussaaqataaneranni inissisimanerat aammattaaq isiginiartariaqarpoq, tusagassiuutit nukittussusiat innuttaasut ataasiakkaat tamanut amassumik innarlineqannginnissamat illersorsinnaanerannut naleqqiullugu. Taamaasilluni pineqarpoq naqisimaneqarani oqaaseqaateqarsinnaatitaanerup aamma inuit ataasiakkaat akuerisaanngitsumik tusagassiuutitigut saqqummiunneqarnissaasa oqimaaqatigiissinnissaat, malittarisassat sanileriit marluk atorneqarsinnaaneranut tunngaviusoq, tassami innuttaasoq kinaluunniit tusagassiuuteqarnermi akisussaassuseqarnermik aqqissuussinerup saniatigut eqqartuussiviit aqputigalugit pinngitsuutitaaniarsinnaamat; periarfissat imminnut mattutinngillat.

Kalaallit Nunaanni tusagassiuuteqarnermi inatsisitigut aqqissuussineq aqqissuussineq, tusagassiuuteqarnermi akisussaaffeqarneq pillugu danskit inatsisiliaannit aallaaveqarpoq, taannalu 1. januar 1992-imi atuutilerpoq, tassuunakkullu Danmarkimi inatsisitigut immikkut suleqatigiissitaliortoqarpoq, tusagassiuutit pillugit naammagittaalliutinik suliaqartartussamik. Nunarsuarmioqatigiit eqqarsaatigalugit, taama aqqiineq immikkuullarissuuvoq, tassami tusagassiuutit soqutigisaqatigiiffittut nalinginnaasumik namminneq tusagassiornekkut ileqqorissaarnissamat maligassiisarmata naammagittaalliorfissaqartitsillutillu, soorlu Danmarkimi pissutsit aallaqqaammut aamma taama issimagaluartut. Taamaattumik una siunnersuut oqaluttuarisaanikkut ineriartornermut attuumassuteqarpoq, tassami siunnersuut aamma takutitsimmat, Kalaallit Nunaanni tusagassiuuteqarnekkut aqqissuussaaneq namminerisamik piorsaavigineqalersoq.

Tusagassiornermi ileqqorissaarnissamik piumasaaqateqarnerup saniatigut, eqqartuussivitsigut kinguneqartitsiviginneqqusilluni, taarsiivigeqqulluni matussuseqqusillunilu suliassanngortitsisoqarsinnaavoq. Tamatumunnga nassuiaat tassaaginnangilaq tusagassiuutit kiffaangissuseqarnissaasa isumassorneqarnerat,

aammali eqqarsaatigineqarlutik innarlineqarsimasut arlalitsigut tunuartilertarmata, angerlarsimaffiup innarligaasimanera pillugu eqqartuussisulersuussinerup nassatarisinnaasaanik imminnut ilaqtutaminnullu artukkerumanatik. Eqqartuussivitsigut suliap ingerlanneqarneranut atasumik avammut saqqummiunneqaqqissinnaaneq ima nanertuutaatigisinnaavoq, allaat pineqartup tusagassiummik pineqartumik eqqartuussivinnut tunniussinissi unitsiinnarsinnaallugu. Tassunga sanilliullugu tusagassiuutit ileqqorissaarnissaannik piunaffiginninnerup iluani suliassanngortitsisinnaaneq periarfissiivoq eqaannerusumik naammagittaalliorsinnaanissamut, kiisalu akeqanngitsumik amerlasuutigullu sukkanerusumik saqquminnginnerusumillu suliat ingerlanneqarsinnaanerit, taamalu periarfissatut orniginarnerusinnaalluni. Eqqartuussivitsigut suliaakkiinnermut sanilliullugu taamanna periarfissaq atorlugu piunasaqaatit kinguneqartitsisinnaanerit annikinnerugaluatut, naammagittaalliorlutum tapersiisumik inerniliineq, tamakkiisuunngikkaluamik naammagisimaarinnineq anguneqarsinnaavoq. Allatut oqaatigalugu tusagassiornermi ileqqorissaarnissamik maleriuqqusat atorlugit innuttaasoq tamakkiisuunngikkaluamik salinneqarsinnaavoq, aammalu malittarisassat ulluinnarni tusagassiornermi ileqqorissaarnissamut sunniuteqarsinnaaneri ilimanaateqarsinnaalluni. Kiisalu aamma isumaavoq, tusagassiornermi ileqqorissaarnissamut maligassaqaarnikkut, tusagassiuutit sulinerat pillugu nalinginnaasumik eqqartuussivitsigut suliassanngortitsisarnerit pakkersimaarneqarsinnaasut.

Oqaatigineqareersutuut siunnersuut una, inatsisitigut periarfissaareersunik annertuumik ingerlatitseqqiineruvoq, Naalakkersuisulli neriuutigaat, pineqartup iluani immikkut inatsi-seqalernikkut, Kalaallit Nunaanni piviusut tunngavigalugit Kalaallit Nunaanni tusagassiuuteqarnerup avammullu siammarteriveqarnikkut maleruagassaqaarneq, inerikkiartortinneqarsinnaanngussasoq.

## 2. Inatsisissatut siunnersuummi qitiusut

a) Inatsit atuuttoq:

Ullumikkut inatsit atuuttoq tassaavoq danskit tusagassiuisarnermi akisussaassuseqarneq pillugu inatsisaat, Kalaallit Nunaannut atuuttussanngortinneqartoq kunngikkormiut peqqussutaat nr. 39, 20. januar 1997-imeersoq aqqutigalugu.

Tusagassiuisarnermi akisussaassuseqarneq pillugu inatsisip erseqqissarpaa, tusagassiuutit aqqutigalugit innuttaasut innarlerneqarpata kina akisussaannersoq, aammalu qulakkeerlugu akisussaaffik akisussaasumut tutsinneqarsinnaajuassasoq. Tusagassiuisarnermi akisussaassuseqarneq pillugu inatsisip aaliangersaaviginngilaa, oqaatsit, allatat, assilissat ilaalu ilanngullugit sorliit avammut saqqummiunneqarpata iliuuseqarfigineqarsinnaanersut imaluunniit suut taarsiivigitinnermik kinguneqarsinnaanersut, tamanna pillugu apeqqut assersuutigalugu pinerluttaalititsinermi inatsisip iluani pasilliinnermut aammalu angerlarsimaffiup eqqissisimatinneqarnerani innarliinnermut malittarisassatigut

aalajangersaaffigineqarmata, kiisalu piginnittussaataitanermut aaliangersakkaniimmata.

Tusagassiuutit naqisimaneqanngitsumik oqaaseqaateqarsinnaaneri paasisutissiisinnaanerilu killiligaapput, inatsiseqarnermi naqisimaneqarani oqaaseqaateqarsinnaatitaanerup killissaatut aalajangersakkani. Pinerluttaalisitsineq pillugu aaliangersakkat unioqqutinneqarsimaneriniq naliliineq eqqartuussiviit ataanniippoq. Pinerluttaalisitsinermut inatsip iluani inuup eqqissimatinnegarnissaanik innarlerneqannginnissaanillu qulakkeerinninnermut tapertatut pingaarutillit tassaapput, tusagassiornermi ileqqorissaarnissamut innersuussutit, taagorneqartut tusagassiornermi ileqqorissaarnissamut malittarisassat, Kalaallit Nunaanni Tusagassiuutit pillugit Aaliangiisartunit suliarineqarsimasut.

Tusagassiornermi ileqqorissaarnissamut malittarisassat ilitsersuutaasut saniatigut, pinerluttaalisitsinermi inatsisip naqisimaneqanngitsumik oqaaseqaateqarsinnaanermik ullumikkut killiliinerinut tapertaavortaaq, tusagassiuisarnermi akisussaassuseqarneq pillugu inatsisikkut tusagassiuutit pisussaaffilerneqarneri, kissaateqartoqartillugu tamanut ammasumik paasisutissanik tigussanik naqqinissaanik. Periarfissaq tamanna taagorneqarpoq akissuteqarsinnaatitaanermik. Akissuteqarsinnaatitaanermik apeqqutit pillugit aaliangiisinnaanerit ullumikkut Kalaallit Nunaanni Tusagassiuutit pillugit Aaliangiisartunit isumagineqarput. Akissuteqarsinnaatitaaneq pillugu malittarisassat isumaqarput, atuagassiat naafferartumik saqqummersartut tamarmik assigiimmik, akissuteqarsinnaatitaanermik malittarisassat ataanniimmata, taakkununga ilaallutik aviisit, atuagassiat sapaatip-akunnikkaartumik saqqummersartut, atuagssiat suliamut aaliangersimasumut tunngasut, kiisalu radiukkut tv-kkullu ingerlatsiviit tamarmik.

Aammalu tusagassiuisarnermi akisussaassuseqarneq pillugu inatsisip tusagassiuutit periarfissippai paasisutissiisut kinaassusilerneqanngitsut atorlugit saqqummiisinnaanerinut, peqqutigalugu nutaarsiassaamut saqqummiussamut sumulluunniit tamatigut akisussaasoqartuassammat.

Inatsit maanna atuuttut imarivaat tusagassiuuteqarnermut tunngatillugu inatsisiliornikkut akisussaannermik aaqqissuussineq, ilaatigut nassataqartoq inuit akisussaatinneqarsinnaasut killiligaanerannik, akerlianilli tusagassiuutit imarisaannut inaarutaasumik akisussaasussamik tamatigut toqqaasoqarsinnaalluni, tassalu aaqqissuisoq.

Tusagassiuisarnermi akisussaassuseqarneq pillugu inatsimmi pineqarput qangaaniit tusagassiuutit atorleqartut, tassalu atuagassiat, radio aamma tv. Kisianni tusagassiuutit nutaajunerusut soorlu qarasaasiatigut paasisutissiiviit, aamma tusagassiuuteqarnerup iluani akisussaaffiup qanoq inissisimaneq pillugu malittarisassat ataanniissinnaapput, piumasaqaatit aaliangersimasut eqqortinneqarpata. Qarasaasiat atorlugit nutaarsiassiivik nutaarsiassaqaartitsivittut nammineertutut, allanut attuumassuteqanngitsunik aaqqissukkanik nutaarsiassaqaartitsisutut saqqummertussaannermi saniatigut, qarasaasiakkut nutaarsiassiivik Kalaallit Nunaanni Tusagassiuutit pillugit Aaliangiisartunit nalunaartussaataavoq, inatsisit iluanniilissaguni. Tamatuma nassatarivaa

innuttaasut, Kalaallit Nunaanni Tusagassiuutit pillugit Aaliangiisartunut tusagassiinermi ileqqorissaarnissamut akerlilisinnaanermullu tungasut misilitsinniarlugit suliaassanngortitsisinnaannginnerat, qangaaniilli tusagassiuutit toqqaannartumik inatsisip ataaniittut eqqaassanngikkaanni. Aaqqissuusinerup maanna atuuttup aammattaaq nassatarivaa assersuutigalugu najugarisami arsaattartut peqatigiiffiata ilaasortaminut aviisia ingerlaannartumik inatsisip ataaniinniartoq, suliffiup anginerusup kommunilluunniit qarasaasiakkut nutaarsiassaqaqtitsinera tusagassiinermi inatsisitigut akisussaannermut tunngatillugu aaqqissuussinerup ilaatinneqarsinnaanngimmat. Taamaammat innuttaasut nutaarsiassaqaqtitsivinnit inatsisit ataaniinngitsunit innarlugaasutut misigisut eqqartuussivinnut saaffiginittariaqarput, naammagittaaliutit taamaattut Kalaallit Nunaanni Tusagassiuutit pillugit Aaliangiisartut suliarisinnaanngimmatigik..

Saniatigut inatsimmi qitiuvoq, tusagassiuutit pillugit aaliangiisartut pilersinneqarnikuummata, ilaasortai inatsisinik atuutsitsinerup ministerimit ivertinneqartartut, aammattaaq tusagassiornermi ileqqorissaarnermik unioqqutitsinerit pillugit suliat aallaavigisarpaat, tusagassiornermi ileqqorissaarnermut innersuussutitut malittarisassiat, suleqatigiissitap nammineq oqaasertalersorsimasai.

b) Siunnersuut:

Oqaatigineqareersutut siunnersuut tassaavoq Kalaallit Nunaanni tusagassiuuteqarnerup malittarisassiuunneranut tunngasut imminerisamik inatsisiliuunniarlugit suliniutaasut siullersaat. Kalaallit Nunaanni Tusagassiuutit pillugit Aaliangiisartut ilaasortaasa toqparneqarnissaat pillugu malittarisassat nutaarsiassaqaqtitsiviillu qarasaasiakkoortut annertunerusumik ilaatinnealernissaannik periarfissiinerup saniatigutsaniatigut, siunnersuummi maannamut ileqquusut attanneqarput, taakkua siunertaraat tusagassiuutit namminneq aaliangersassagaat tusagassiornermi ileqqorissaarneq qanoq paasineqassanersoq, naak pisinnaatitsissummik inatsisip assersuutigalugu tusagassiuuteqarnermi ileqqorissaarnissaq akerlilisinnaatitaanissarlu pillugit malittarisassanik aaliangersaasinnaatitaaneq Inatsisartunut inissikkaluaraa..

Aammattaaq siunnersuutigineqarpoq, akerlilisinnaatitaanermut malittarisassat atuutereersut siunnersuummi ingerlateqqinneqassasut.

Taakkua saniatigut siunnersuutigineqarpoq siunissami Tusagassiuutit pillugit Aaliangiisartut ilaasortaata Naalakkersuisuniit toqparneqartassasut. Tassunga atasumik toqqaannginnermi oqaaseqartartussat allannguuteqartinneqanngillat.

Nutaarsiassaqaqtitsiviit digitaliusut nutaat saqummeralernerisa kingunerisaannik aammattaaq siunnersuutigineqarpoq, nutaarsiassaqaqtitsiviit digitaliusut ilanngunneqarnissaat pitsaanerusumik periarfissinneqassasoq. Tassunga tunngatillugu siunnersuutigineqarpoq, Tusagassiuutit pillugit Aaliangiisartut tassaassasut tusagassiuutit suut, assersuutigalugu aviisit qarasaasiakkoortitat, allatat tv-kkoortitat (tekst tv) nittartakkallu, inatsimmut ilaatinneqarnissaannik inaarutaasumik aaliangiisussat. Taamaattoq suli piumasaqaataavoq,

nutaarsiassaqaqtitsivik pineqartoq nutaarsiassaqaqtitsivittut namminersortutut saqqummissasoq, arlaannulluunniit attuumassuteqanngitsumik aaqqissukkanik nutaarsiassaqaqtitsisoq, kisianni siunissami tusagassiuutip digitaliusup naammagittaalliutigineqarnerata sularinissaanut piumasagaataajunnaassaaq, tusagassiuutip pineqartup Tusagassiuutit pillugit Aaliangiisartunut imminut nalunaarutigisimanissaa. Taamaaliornikkut ullumikkut aaqqissuussinerup assigiinngisitsisarnera pinngitsoorneqarsinnaalissaaq, tassami innuttaasoq tusagassiuutip digitaliusup imminut pissusilersorsimanera pillugu aatsaat Tusagassiuutit pillugit Aaliangiisartunut naammagittaalliorsinnaavoq, tusagassiuut pineqartoq Tusagassiuutit pillugit Aaliangiisartunut imminut nalunaarutigisimappat, innuttaasorli assersuutigalugu qarasaasiakkut nutaarsiassaqaqtitsiviup imminut pissusilersorsimanera pillugu naammagittaalliorsinnaani, tusagassiuutip pineqartup Tusagassiuutit pillugit Aaliangiisartunut imminut nalunaarutigisimanninnera pissutiginnarlugu.

Aammattaaq siunnersuummi qitiuvoq, malittarisassani pingaartinneqartoq tassaammat akisussaaffiup inissinneqarnissaa pillugu apeqquq, tusagassiuuteqarnerlu pillugu inatsisiliornikkut aaqqissuusinermi tassani immikkut ittoq tassaavoq, aaqqissuisoq imaluunniit aallakaatitamut akisussaasoq annerusumik minnerusumilluunniit toqqaannartumik inaarutaasumik tusagassiuutip iliuisaanut akisussaassammat. Allatut oqaatigalugu malittarisassat qularnaarpaat, qaqugukkulluunniit nalornissutaassanngimmat, kina tusagassiuummut akisussaannersoq, tusagassiuutini naqisimaneqanngitsumik oqariartuuteqarsinnaanerup pitsaanerpaanik atugassaqaqtitaanissaata qularnaarniarneranut tunngatillugu. Tamatumunnga pissutaavoq aaqqissuisup allaaserisap atertaqartinneqanngitsup saqqummiunnera akisussaaffigisinnaammagu, aaqqissuisoq isumaqaruni imarisai saqqumilaartariaqartut, allaaserinnittoq nammineq atimigut taaneqarluni saqqummerusussanngikkaluarpalluunniit. Aammattaaq malittarisassat periarfissiippat paasissutissiisut atertaqartinneqanngikkaluartut atornerarsinnaanissaannut, tassami tusagassiuutikkut saqqummiunneqartut imarisaannut aaqqissuisoq inaarutaasumik akisussaavoq.

Ilutigisaanik tusagassiuinermi ileqqorissaarnissamik malittarisassat tusagassiuutit pillugit inatsitigut akisussaaffeqarnermik aaqqissuussinermi pingaaruteqartumik inissisimappat, taamatuttaaq ilisarnaqutaavoq malittarisassat immikkuualuttukkaartut taakua inatsisissatut siunnersuummi imminermi inissinneqanngimmata, tamatumunnga pissutaavoq, ileqqorissaarnissamik malittarisassat ilaatigut tassaammata suliap qaffasissusissaatut isigisat ersiutaat, tusagassiuutit namminnek sulinerminni maleruartaqassatut aaliangiussaat. Qiviaannarlugu inatsisiliornikkut nangaanartoqarsinnaavoq tusagassiuinermi ileqqorissaarnissamik malittarisassat inatsimmut imminermut ilanngullugit allanneqannginnerat, taakkua unioqqutinneqarneranni kinguneqartitsisoqarsinnaanera eqqarsaatigalugu. Tassungali tunngatillugu eqqaaneqassaaq, oqartussaaffik Tusagassiuutit pillugit Aaliangiisartutut ilusilik, ileqqorissaarnissamik malittarisassanik unioqqutitsineq pillugu aaliangiisartoq, tassaannngimmat eqqartuussivik, aammalu kinguneqartitsineq tassatuaavoq, aaliangiisartut isornartorsiuissinnaanerit, taamatullu aaliangiisartut aaliangiinerisa piviusunngortinnissaannut pinngitsaaliissutaasinnaasunik ilaqartitsisoqanngilaq. Taakkua saniatigut tusagassiuinermi ileqqorissaarneq

tassaangilaq inatsisitigut malittarisassaliorneq, kisiannili ileqqorissaarnissamut tunaartarisassaliornerulluni. Taamaalilluni tusagassiuinermi ileqqorissaarneq tassaalerpoq, tusagassiuuteqarnerup iluani pitsaasumik iliuuseqarnertut isigineqartut atuuttut aallaavigalugit nalinginnaasumik iliuuserineqartartussatut isigineqartoq. Ileqqorissaarnissamut malittarisassat taamaattut, inatsisiliornikkut malittarisassat aqcutigalugit ersarissumik tamakkiisumillu oqaatiginissaat ajornakusoorput. Tamatumunnga ilannguttariaqarpoq nutaanik pisoqarsinnaammat, uuttuutaasartut atuuttut malillugit allaaserineqarsinnaanngitsunik imaluunniit nalilerneqarsinnaanngitsunik, soorluttaaq ileqqorissaarnissamik malittarisassat imminerminni tassaangitsut aaliangiussat allanngujitsut, tassaallutilli piffissap ingerlanerani ileqqorissaarnertut imaluunniit ileqqorissaannginnertut isiginneriaaseqarnermik sunnerneqartuutut. Kiisalu erseqqissarneqassaaq ileqqorissaarnissamik malittarisassat, imminerminni ilusertik kisiinnaalluunniit pissutigalugu, tassaasariaqarmata tusagassiortutut sulinermi pissusilersornermilu tunaartarisassat nalinginnaasumik maleruarniarneqarsinnaasut tasaanatik pinngitsoorani maleruagassat.

Tullinguullugu qulequtakkaartumik oqaaseqaatit saqqummiunneqassapput, ullumikkut inatsisitigut ilusiliisimanermit allaanerussuteqangaanngitsut:

1) Siunnersuummi tusagassiuutit suut pineqarpat:

Siunnersuutip iluaniippoq, Tusagassiuutit pillugit Aaliangiisartut tassaasut Kalaallit Nunaanni atuagassiat naafferartumik saqqummersartut, soorlu aviisit, atuagassiallu allat aammalu radiukkut tv-kkullu aallakaatitat pillugit suliani kisimiillutik aaliangiisinnaasut. Tamatuma saniatigut siunnersuutigineqarpoq, Tusagassiuutit pillugit Aaliangiisartut suliarisinnaassagaat suliat qarasaasiakkut nutaarsiassaqaqtitsivinnut tunngasut, taakkua nutaarsiassiisarnertut iluseqarpata, ingerlatsivinnillu Aaliangiisartut inatsimmut ilaasutut aaliangiussaannit ingerlanneqarpata. Nutaarsiassaqaqtitsiviit elektroniskiusut tusagassiuinermi akisussaaffeqarneq pillugu inatsisip ataaniinngitsut, pinerluttaalisitsinerimi inatsit naapertorlugu akisussaatinneqarsinnaajuaassapput. Radiukkut tv-kkullu piseqqusaarutit imaluunniit aningaasaliisuusarnerit pillugit naammagittaalliutinut tunngatillugu, tusagassiuinermi akisussaaffeqarneq pillugu inatsimmut paarlaallugu radio aamma tv pillugit inatsisit atuupput.

Tusagassiuutinutt naqitanut, soorlu ullormut saqqummersartut, sapaatip-akunneranut saqqummersartut aamma aviisit, tunngatillugu piumasaqaataavoq tusagassiuutit allakkatigut nalunaarutitik imaluunniit oqariartuutitik assilissatut allatigulluunniit takusassiatut ilusilikkanik imaqarnissaat, soorluttaaq piumasaqaataasoq tusagassiuutit amerlasuunngortinneqartassasut, inunnut killilinnut naatsorsuussaasinnaallutik, assersuutigalugu peqatigiiffiit saqqummersittagaattut. Aammattaaq tusagassiuutit ikinnerpaamik ukiumut marloriarlutik saqqummersinneqartassapput, aaliangersimasunik piffissalersugaanngikkaluamik. Kiisalu saqqummersitsisup ingerlatsinera Kalaallit Nunaanni pissaq.

2) Siunnersuummi innarliinerit suut pineqarpat:

Innarliinerit suut inatsisimmut ilaatinneqarnissaat pillugu malittarisassat maanna atuuttut ingerlatiinnarneqassasut siunnersuutigineqarpoq. Nalinginnaasumik tassaagajupput pasilliinikkut ajuallatsitsinerit, angerlarsimaffimmik innarliinerit imaluunniit piginnittussaataaernerimik innarliinerit, aammalu malittarisassani pineqarlutik saqqummiussap allakkatigut aammalu assilissatigut imarisai.

Kisianni malittarisassat innarliinernut tamanut tusagssiuutinit, tusagassioortunit assiliisunilluunniit piliarineqartunut atuutinngillat. Nalinginnaasumik akisussaaneq pillugu malittarisassat atuupput, innarliineq ima annertutigippat, immikkut erseqqissarneqarluni.

### 3) Aaqqissuisup akisussaaffii:

Siunnersuutigineqarpoq nammineerluni iliuuseqartuunngikkaluarluniluunniit akisussaataasaaneq (objektiv ansvar), akisussaalluni aaqqissuisunut pisut ilaanni atuuttartoq, attatiinnarneqassasoq. Tamatumaa nassatarivaa aaqqissuisoq akisussaatinneqassammat, allaaserisaq imaluunniit asseq ilisimasaqarfigisimannngikkaluarunigilluunniit. Nammineerluni iliuuseqartuunngikkaluarluniluunniit akisussaataaernerimut ilaapput allaaserisat assillu, allaaserinnittup assiliisulluunniit aqqanik ilaqaratik saqqummiunneqartut, tak. siunnersuummi § 11, imm. 1. Aammattaaq taamaassaq, tusagassioortoq assiliisorluunniit atiatigut taasaq akisussaatinneqarsinnaatinnagu, taassuma nunai allani najugartuunera imaluunniit tarnikkut naatsorsuutigineqarsinnaannginnera pissutigalugit, tak. siunnersuummi § 11, imm. 2, taamatuttaaq nammineerluni iliuuseqartuunngikkaluarluniluunniit akisussaaneermut ilaassapput allaaserisanik, assinik oqaaseqaatinilluunniit tusagassiummi allami atertaqartillugit saqqummiunneqarsimasuni ingerlatitseqqinneq. Taamaattoq eqqaaneqartumi kingullermi tusagassioortoq imaluunniit assiliisoq akisussaassaq saqqummiinissamut akuersisimaguni, tak. siunnersuummi § 12.

Malittarisassat aammattaaq nassatarissavaat, aaqqissuisoq akisussaassammat, qulequttanut allanulluunniit, aaqqissuinerimik allattoqarfiup tusagassioortoq allaaserinnittoq akuersiteqqaarnagu ikkussaanut.

Tamakkua saniatigut malittarisassat nassatarivaat, aaqqissuisoq ilaanneeriarluni, assersuutigalugu assiliisoq imaluunniit allaaserinnittoq atertaqartinneqartoq peqatigalugu, akisussaaqataatinneqarsinnaammat, tak. § 13. Tassani pineqarpoq, allaaserisaq assilisarluunniit aaqqissuisup ilisimasaanik tusagassiummi aalajangersimasumik suleqataasumit suliarineqarsimappat, imaluunniit aaqqissuisoq peqataasimappat, soorlu allaaserisap assilisalluunniit suliarinissaanut saqqummiunneqarnissaanullu kaammattuinerimigut, tamannattaaq atuutissaaq, aaqqissuisup ilisimasimappagu, allaaserisaq asserluunniit eqqunngitsuusoq imaluunniit angerlarsimaffiup innarlineqannginnissaanik unioqqutitsisusoq. Kiisalu malittarisassaq atuuppoq pilersaarutit inatsisinik unioqqutitsisunik imaqartut saqqummiunneqartillugit, aaqqissuisup tamanna ilisimasimappagu ilisimasiaqaraluarpagulunniit, aamma aaqqissuisoq qularutigineqartussaannngitsumik akisussaavoq pineqartup pilersaarisuusup kinaanera naluppagu oqaatigiumanagulunniit, tak. siunnersuummi § 27.



#### 4) Tusagassiortup aamma assiliisup akisussaaffii:

Tusagassiortut assiliisullu akisussaaffii pillugit ullumikkut aaliangersakkat atuuttut ingerlateqqinneqaannarnissaat siunnersuutigineqarpoq. Tamatuma nassatarivaa, tusagassiortut allallu allaaserinnittut imarisamut akisussaammata, taassuma akuersineratigut aqqa taallugu allaaserisaq saqqummiunneqarpat. Taamatuttaaq ippoq assiliisup akuersineratigut aqqa taallugu asseq saqqummiunneqarpat.

Malittarisassat erseqqissarpaattaaq, tusagassiortoq assiliisorluunniit aamma akisussaammata, ateruseq ilisarnaallunniit atorlugu saqqummiussisoqarnissaa akuersimagunikku, nalinginnaasumillu ilisimaneqarpat, kia suliarineraa, tak. siunnersuummi § 10, imm. 1. Allaaserisamut allaaserinnittutut arlallit taaneqarpata, akisussaaffik taakku akornini avinneqassaaq, takuneqarsinnaanngippat immikkoortut sorliit tamarmik immikkut allassimaneraat, tak. siunnersuummi § 10, imm. 3.

Soqutigisaqaqatigiiffik, peqatigiiffik allatulluunniit ataatsimoorfik allaaserinnittutut taaneqarpat, akisussaaffik aqutsisunut tutsinneqassaaq, tak. siunnersuummi § 10, imm. 4. Tassunga atasumik oqaatigineqassaaq, aaqqissuinermi allatsit allallu atuagassiap aaqqissornerani suliarineranilu peqataajunnartut, imarisamut akisussaangimmata. Taamatullu tusagassiortoq akuersiteqqaarnagu ilassutinut, soorlu qulequttanut allatigulluunniit allanit ikkussanut akisussaangilaq, aammalu tusagassiortoq aqqatigut taasamik issuaasoq akisussaatinneqassanani, sammisaq inuiaqatigiinnut soqutiginaateqarpat, innarligaasorlu akerliliinissaminut periarfissinneqarsimappat.

#### 5) Naqiterisitsisup akisussaaffii:

Siunnersuummi takuneqarsinnaavortaaq, naqiterisitsisoq nammineerluni iliuuseqartuunngikkaluarluniluunniit pisut ilaanni akisussaatinneqarsinnaasoq, tak. siunnersuummi § 15. Tamatuma nassatarivaa, naqiterisitsisoq akisussaatinneqassammat, allaaserisaq imaluunniit asseq ilisimasaqarfisimannngikkaluarunigilluunniit. Malittarisassa taanna taamaallaat atuutissaaq, akisussaaffik aaqqissuisumut tutsinneqarsinnaanngippat, tusagassiuutip naqitap akisussaalluni aaqqissuisup kinaaneranik nalunaarsuisimannginera pissutigalugu, imaluunniit akisussaalluni aaqqissuisoq nunami allami najugaqarpat, imaluunniit akisussaalluni aaqqissuisoq tarnikkut naatsorsuutigineqarsinnaanngippat.

Pineqartut saniatigut siunnersuutip nassatarissavaa, tusagassiortut, assiliisut akisussaallunilu aaqqissuisup akiliisussanngortitaaneranut, taarsiinissamik piumasqaateqarfigineranut suliamullu aningaasartuutinik akiliisussanngortitaaneranut, aallaqqaammut naqiterisitsisoq akisussaassammat, tak. siunnersuummi § 26, imm. 1 aamma § 30. Siunnersuummi § 26, imm. 2-mi saqqummerportaaq, akiligassiissutip annertussusaanut apeqqutaammata unioqqutitsinerup suussusaa qanorlu annertutiginera, saqqummiussap qanoq siammaanneqartiginera unioqqutitsinermilu iluanaarutit qanoq amerlatigineri. Kiisalu siunnersuutip nassatarivaa, akisussaasutut tusagassiortoq, assiliisoq imaluunniit akisussaasutut aaqqissuisoq, akiligassiissutit eqqarsaatigalugit naqiterisitsisumiit utertitsiniarfineqarsinnaammata. Ilanngullugu

siunnersuutigineqarpoq, naqiterisitsisutut akisussaaneq aamma atuutissasoq, naqiterisitsisoq pisortaneersuuppat imaluunniit namminersortutut soqutigisaqaqatigiiffiuppat, tak. siunnersuummi § 15, imm. 2.

6) Paasissutissiisut akisussaaffii:

Siunnersuutip nassatarivaa, paasissutissiisut oqaaseqaatinut issuaanertut saqqummiunneqartunut ilaanneeriarluni akisussaaqataatinneqarsinnaanerak, tak. siunnersuummi § 14. Siunnersuutigineqarpoq malittarisassaq taanna atorneqartassasoq, oqaaseqaat eqqortumik issuarneqarsimappat, paasissutissiisullu atimi ilanngunneqarnissaa akuerisimappagu.

### 3. Aningaasatigut allaffissornikkullu pisortanut sunniutaasut

Siunnersuutip aningaasatigut allaffissornikkullu Namminersornerullutik Oqartussanut imaluunniit kommuninut sunniuteqarnissaa naatsorsuutigineqanngilaq.

### 4. Aningaasatigut allaffissornikkullu suliffeqarfeqarnermut sunniutaasut

Siunnersuutip aningaasatigut allaffissornikkullu suliffeqarfeqarnermut sunniuteqarnissaa naatsersuutigineqanngilaq.

### 5. Avatangiisinut pinngortitamullu sunniutaasut

Siunnersuut avatangiisinut pinngortitamullu sunniuteqassanngilaq.

### 6. Allaffissornikkut innuttaasunut sunniutaasut

Siunnersuutip allaffissornikkut innuttaasunut sunniuteqarnissaa naatsorsutigineqanngilaq.

### 7. Naalagaaffeqatigiinnermut namminersornermullu tunngasut

Namminersuleriartorluni ineriartorerup kingunerisaanik, una siunnersuut pisuuvoq.

### 8. Pisortanik soqutigisaqaqatigiinnillu tusarniaaneq

Inatsisissatut siunnersuut ukununga tusarniutigineqarsimavoq:

Kalaallit Nunaanni Tusagassiuutit pillugit Aaliangiisartut

KNR

STTK

Sermitsiaq

AG

Radio aamma tv pillugit Aaliangiisartut

Aningaasaqarnermut Pisortaqaarfik

Ilaqtariinnermut Inatsisinillu atortitsinnermut Pisortaqaarfik

Kalaallit Nunaanni Tusagassiortut Peqatigiiffiat

Kalaallit Nunaanni Politimesteri  
Kalaallit Nunaanni Naalagaaffiup Aallartitaa  
Kalaallit Nunaanni Eqqartuussivik  
KANUKOKA

Tusarniaanermi piffissaliussap qaangiunnerani ukunannga akissuteqartoqarsimavoq:

KANUKOKA-mit oqaasertaliussat:

Tusagassiuuteqarnerup silarsuaata paasiuminaassartortup, saniatigullu paasissutissiinermut teknologiip sukkasuumik ineriartorfiani, pitsaasuvoq tusagasiuisarnerup iluani akisussaaffilersuinikkut naapertuuttumik paasinartunik toqqammaveqarnissaq, atuisut aamma tusagassiuutit eqqarsaatigalugit. KANUKOKA-p pissusissamisoorippaa, Kalaallit Nunaata namminerisaminik inatsiseqalernissaa.

KANUKOKA-p siunnersuut tusagassiuutinik nakkutilliiniutitut isiginngilaa, kisiannili tusagassiuutit silarsuaanni, sukkasuumik paasissutissiinissamut suleqatigiinnissamullu annertusiartuinnartumik periarfissiisumi, nalornisoornernik akisussaaffiilu pillugit qulaajaanermi tigussaasumik sakkussatut isigalugu.

Taamaattumik aamma siunertamut naapertuuppoq, tusagassiornermi ileqqorissaanissamut malittarisassat inatsimmi imminermi allaqqanngimmata, kisiannili innersuussatut ilanngunneqarlutik, malittarisassatut tunngaviusutut ilitsersuutaasutullu iluseqarlutik. Tamatuma akisussaanagermi periutsinut tunngasut ileqqorissaanermullu tunngasut avissaartinneqarnissaasa pisariaqartuunerat ersersippaa.

Sumiiffinni oqartussaaqatigiit suleqatigiiffiitut, Kalaallit Nunaanni kommuninut, kattuffittut KANUKOKA-p soqutigisarivaa ineriartornermi demokratiskiusumi peqataasunik kiffaanngissuseqartunik tusagassiorfeqarnissaq, Pineqartup iluani akisussaaffeqarnermik aqqissuussineq pillugu siunnersuutigineqartutut inatsisip qularnaassavai ersarissunik aqqissuullugaasunillu sinaakkuteqarnissaq, tusagassiornermilu ileqqorissaanissaq pillugu ilitsersuutaasumik malittarisassat inatsimmut atasut qularnaarinneqataasinnaallutik, tusagassiuutit paasissutissiinermik naqisimaneqaranilu oqaaseqaateqarsinnaanermik ingerlatsinerisa pitsaasumik qitiutinneqartuarnissaannut.

Kalaallit Nunaanni politimesteri ilaatigut ima oqaasertaliussaqqarpog:

Siunnersuummi § 28-mi ersippoq, Kalaallit Nunaanni Politimesterip aaliangertassagaa, tusagassiuutip inatsisimmi pineqartup imarisai pequtugalugit suliaannngortitsisoqassanersoq. Tusagassiuuisarnermi akisussaassuseqarneq pillugu danskit inatsisaanni allaqqavoq, Naalagaaffiup unnerluussisuunera (Rigsadvokat), pineqartuni suliaannngortitsisinnaaneq pillugu aaliangiisartuusoq. Malittarisassaq taanna – eqqartuussisaaseq pillugu inatsimmi malittarisassanik sanioqqutitsiffiusoq, unnerluussinermi periutsinik assigiissarinissamik kissaateqarneq tunuliaqutaralugu aaliangiunneqqarpog.

Politimesterip ilisimatitsissutigaa, Naalagaaffiup unnerluussisuunerata eqqarsaatigiumagaa, tamatumalu kingunerisaanik Kalaallit Nunaanni politimesteri pisussaaffilerneqassaaq – maanna oqaasertaliussat attatiinnarneqassappata - Kalaallit Nunaanni tusagassiuinermi akisussaassuseqarneq pillugu inatsit unioqqutinneqartillugu suliaasat Naalagaaffiup unnerluussisuuneranut saqqummiuttaqqullugit.

Tamanna tunngavigalugu Politimesterip siunnersuutigaa, aaliangersagaq oqaaseqatigiiliorneqassasoq, danskit inatsisaanni oqaaseqatigiiliorneq naapertorlugu.

*§ 28-mi oqaaseqatigiit allanngortinneqarput, taamaasilluni Naalagaaffiup unnerluussisuunera aaliangiisussaatinneqarluni, tusagassiuutit inatsisip ataani ittut imarisaat peqqutigalugit suliaassanngortitsisoqassanersoq.*

Radio aamma tv pillugit Aaliangersaasarfik ilaatigut ima ittunik oqaasertaliussaqarpoq:

Radio aamma tv pillugit Aaliangersaasarfiup pitsaasutut nalilerpaa, tusagassiuinermi akisussaassuseqarneq pillugu Kalaallit Nunaat inatsiseqalissammat.

Aammattaaq Radio aamma tv pillugit Aaliangersaasarfiup maluginiarpaa, siunnersuut naapertorlugu naammagittaalliutit allaganngorlugit tunniunneqartarnissaat. Siunnersuutigineqassaaq aamattaaq erseqqissarneqassasoq, e-mailikkut allakkat atorlugit naammagittaalliutip Tusagassiuutit pillugit Aaliangiisartunut apuunnissaa periarfissaasoq, ullumikkummi taamatut attaveqatigeeriaaseq tassavoq allakkatigut attaveqariaaseq nalinginnaanerpaajusoq.

Tusagassiuutit pillugit Aaliangiisartut inuttalernerqarnerat pillugu siunnersuutigineqarpoq, siulittaasoq tullersortaalu inatsisilerituujuussasut. Radio aamma tv pillugit Aaliangersaasarfik isumaqanngilaq taaneqartut marluk immikkut inatsisilerituujuunissaat, nunaqavissut inatsisilerituuutut ilinniarsimasut amigaataanerat peqqutigalugu.

*Tassunga tunngatillugu Naalakkersuisut oqaatigiumavaat Tusagassiuutit pillugit Aaliangiisartunut naammagittaalliutit allakkatigut ingerlanneqarnissaannik piunasaqaat, tak. § 44, peqquteqarmat naammagittaalliortup kinaassusersineqarnissaanik. Allakkatigoortitsinissamik piunasaqaatip taamaallaat pivaa, naammagittaalliutip allagaasimanissaa, qanorli nassiunneqarnissaa pineqarani, taamalu Tusagassiuutit pillugit Aaliangiisartunut naammagittaalliummik apuussineq pisinnaammat email faxilu atorlugit. Nassiussinermi periusaasinnaasut erseqqinnerusumik nassuiarnissaat pisariaqarsorineqanngilaq.*

*Tusagassiuutit pillugit Aaliangiisartut inuttaligaanerisa, tak. § 41, siulittaasup tullersortillu inatsisilerituujuuffigisaasa ullumikkut inatsisitigut pissutsit nangeqqinnerivaat, tamatuma ingerlaannarnissaa kissaatigineqarluni, tassuunakkut*

*Tusagassiuutit pillugit Aaliangiisartut suliaasariligaanni pitsaasumik suliamillu ilisimaarinnilluarluni suliarinninnissaq tamatigut qularnaarneqassaaq.*

KNR-ip ilaatigut makku oqaasertaliuppai:

Ataatsimut isigalugu pineqartoq tassaavoq inatsisiliornerup ilisimaneqareersup pisinnaatitsinerinik tigusineq, tassunga atasumik kingusinnerusukkut aaqqiinissamut periarfissaqartoq. Tamanna tunngavigalugu KNR-ip qilanaaraa, tusagassiuutit tusagassiuuteqarnerlu pillugit inatsisit inerisaqqinnissaannut tunngaviliisoqarnissaa, Kalaallit Nunaanni pissusiviusunut naleqqiullugu. Pissusiviusut arlalitsigut annertuumik allaassuteqartut, inuiaqatigiit mikinerusut milliunikkaanik inuttarfiunngitsut pineqarnerat pissutigalugu.

Tusagassiornermi ileqqorissaarnikkut pissusiviusut Kalaallit Nunaanni allaanerunerat ersersikkumallugu, tusagassiornermi ileqqorissaarneq pillugu KNR ilumini immikkut aaliangersagaqarpoq tusatsiakkat tusatsiakkallu pilersarneri pillugit.

KNR-ip maluginiarpaattaaq, tusagassiuutit nutaat – soorlu telefoni - ilanngullugit eqqarsaatigineqanngimmata. SMS aamma MMS teknikkullu periarfissaasinnaasut allat aqqutigalugit kiffartuussinerit inuit amerlasuut ullumi atulereerpat ungasissorsuungitsukkullu kikkut tamarmik atulersimassallugit. Kiffartuussiviit tamakku aamma paasissutissanik nutaarsiassanut, timersornermut il. il. tunngasunik imaqtartassapput. Taamaammatt kiffartuussiviit nutaat taamaattut pillugit aaliangersaanerit, siunnersuummi ilanngunneqarsimasariaqaraluarput.

*Tassunga atasumik Naalakkersuisut oqaasertaliutissavaat, § 8, imm. 1 naapertorlugu Tusagassiuutit pillugit Aaliangiisartut aaliangertussaammassuk, tusagassiuutit sorliit § 1, nr. 3-mut ilaatinneqassanersut. Aaliangersakkap taassuma aammaappa, tusagassiuutit allat, soorlu KNR-ip taasai, inatsisissatut siunnersuutitp ataaniitinneqalersinnaanerat.*

AGp aamma Sermitsiap ataatsimoorlutik tusarniaanermut akissumminni ilaatigut makku oqaasertaliuppaat:

AG-p aamma Sermitsiap § 8 isumaqataaffiginngilaat, taanna naapertorlugu Tusagassiuutit pillugit Aaliangiisartut kisimiillutik aaliangersinnaammassuk, tusagassiuutit allat inatsisip aaliangersagaasa ataaniissanersut. AG aamma Sermitsiap isumaqarput, ullumikkut aaqqiisimaneq atuuttoq, tusagassiuutit Tusagassiuutit pillugit Aaliangiisartunut nalunaartussaataaffigisaat, ingerlaqqittariaqartoq. Aaqquissuussinerup kingunerisussaassagaluarpa ilaanneeriarluni nutaarsiassaqartitsiviup qarasaasiakkut saqqummersitasa tusagassiuuteqarmut inatsisinut ilaannginnerat, naak nutaarsiassaqartitsivik taanna naafferartumik nunap iluani saqqummersartutut malittarisassanut ilaagaluartoq.

Tusagassiuutit namminneq soqutigisarilluinnarpaat, tusagassiuutit pillugit inatsisitigut malittarisassat ataanni inissisimanissartik, ilaatigut Kalaallit Nunaanni eqqartuussiveqarneq pillugu inatsisip ataani paasissutissiisup illersorneqarnissaa

pillugu malittarisassat atorsinnaajumallugit, taakkualu taamaallaat tusagassiuutitut tusagassiuinermi akisussaaffeqarneq pillugu inatsimmi pineqartunut atuupput.

Taamaalilluni tamanna aaqqissuisup akisussaanerata naapertuutinngitsumik mangiarneqalerneranik nassataqarsinnaavoq, suliffeqarfiup nittartagai il.il. nutaarsiassanik annertunngitsumik taamaallaat imaqartut, tusagassiuuteqarnikkut inatsiseqarnerup silarsuaanut, suliffeqarfiup nammineq peqataaffigisamit isiginngilluinnangaanut, pinngitsaalillugit ilanngunneqassappata.

*§ 8-mut atatillugu allaqqaasiullugu oqaatigineqassaaq, Tusagassiuutit pillugit Aaliangiisartut ilaatigut tusagassiuutit soqutiginnitaanneersunik ilaasortaaitaqarmata. Aammattaaq Naalakkersuisut maluginiarpaat § 8-p nassatarimmagu, ingerlatsiviup ingerlatitseqqiinnermut § 1, nr. 1-imi taaneqartumut sanilliuuneqarsinnaanera pillugu naliliisoqarnissaa. Taamaalilluni Tusagassiuutit pillugit Aaliangiisartut aaliangersinnaanngilaat, ingerlatsivik nutaarsiassanik teknikkikkut ingerlatitseqqiinerinnarmik, ingerlateqqitanut naleqqiullugu minnerpaamilluunniit namminerisamik suliarineqanngitsunik allatulluunniit aaqqissugaanngitsunik ingerlatsisoq, malittarisassat iluanniitinneqassasoq..*

*Aaliangersakkap kingunerissavaa, ullumikkut aaqqiinnermi assigiinngitsuliortarneq atorunnaassammat, massakkummi innuttaasoq tusagassiuutip digitaliusup imminut pissusilersornera pillugu taamaallaat Tusagassiuutit pillugit Aaliangiisartunut naammagittaalliorsinnaavoq, tusagassiuut pineqartoq Tusagassiuutit pillugit Aaliangiisartunut imminut nalunaarutigisimappat, innuttaasorli assersuutigalugu qarasaasiakkut nutaarsiassaqartitsiviup assingusumik pissusilersornera naammagittaaliutigisinnaanagu, tusagassiuutip pineqartup Tusagassiuutit pillugit Aaliangiisartunut imminut nalunaarutigisimannginnera piinnarlugu.*

Ilaqutariinnermut Inatsisinillu atortitsinnermut Pisortaqarfik oqaasertaliussassaqaqngilaq.

Aningaasaqarnermut Pisortaqarfik oqaasertaliussassaqaqngilaq.

## **Inatsisissatut siunnersuutip immikkut aaliangersagaanut oqaaseqaatit**

### *§ 1-imut*

Aaliangersakkap inatsisip atuuffia erseqqissarpaa, taamalu tusagassiuutit immikkut akisussaaffitsigut aaliangersaavigineqartut sorliit pineqarneri killilerlugu, tak. inatsisissatut siunnersuummut nalinginnaasumik oqaaseqaatit.

### Nr. 1-imut

§ 1, nr. 1-imi siunnersuutigineqarpoq, inatsit atorneqassasoq atuagassianut nunap iluani naafferartumik saqqummersinneqartartunut, assilissat assigisaallu

naqinneqartut allatulluunniit siammarterneqartut ilanngullugit. Siunnersuutip tamatumani ullumikkut malittarisassaasut assingaat. Siunertamut naapertuuttut isigineqanngilaq "allatat naqitat" ersarinnerusumik nassuiaasernissaat, taamaalilluni nassuiaat tassaalerpoq maanna siunissamilu saqqummiussanut, tusagassiuuteqarnikkut inatsisinut ilaatikkumasanut nassuiaat. Siunnersuutip taamaasilluni inatsisinik eqquutitsiniarnermi ileqquusunut aamma allaffissornikkut suleriaatsinut tunniuppaa, "allatat naqitat" suussusilernissaat. Sooq allatap naqitap qanoq suliarineqarnera, allatap tusagassiuuteqarnermi inatsisitigut malittarisassat ataaniitinneqarnissaanut aaliangiisuunissaa, annertunerusumik patsisitalersorneq ajornarmat, siunnersuutigineqarpoq "naqiterneqarlutik allatulluunniit amerlisarneqarlutik" allaaserisanut siunnersuummut ilaatikkumasanut atatillugu oqaasertaliussatut atorneqassasut, soorluttaaq tassuunakkut teknikkikkut amerlisaariaatsit nutaat ingerlaannartumik ilaatinnissaat periarfissaqalissasoq.

Oqaatsit "nunap iluani" aamma "naafferartumik" pillugit § 2-mut oqaasertat innersuussutigineqassapput.

#### Nr. 2-imut

§ 1, nr. 2-mi siunnersuutigineqarpoq, inatsit atortussanngortinneqassasoq nipit assilissallu atorlugit KNR allallu aqqutigalugit aallakaatitanut, radio tv-lu pillugit peqqussut naapertorlugu aallakaatitsinissamut akuerineqarsimasunut. Siunnersuutigineqarpoq tusagassiuutit taakku killelersorneqassasut, radiumik tv-millu ingerlatsineq pillugu inatsisip assinganik, taamaalilluni allatanut nunap iluani naafferartumik saqqummersartunut atatillugu naqiterisitsisoq pillugu tunngaviusumik naligiittoqaleqqullugusmmittulli killilersorneqaqquulu. Tamatuma nassatarissavaa tv-kkut aallakaatitassiat nunap avataaneersut, qaammataasat atorlugit Kalaallit Nunaanni siammarterneqartut, siunnersuummi immikkut akisussaafilersuineq pillugu malittarisassat ataanniissanngimmata, tamatumalumi allatat naafferartumik saqqummersartut nunap avataaneersut pillugit malittarisassat assigissavai. Tusagassiuutit taakkua paarlaallugu inatsiseqarnermi malittarisassat nalinginnaasut iluanniipput.

Aaliangersaanerup aammattaaq nassatarissavaa, sumiiffinni ataasiakkaani aallakaatitsivittut peqatigiiffiit siunnersuutip ataani inngimmata, peqcutigalugu radiukkut tv-kkullu ingerlatsinissamut akuerisaasut kisimik pineqarmata.

#### Nr. 3-imut

Kiisalu siunnersuummi § 1, nr. 3-p nassatarivaa, siunnersuummut aammattaaq ilaammata allatat, assilissat nipilu atorlugu aallakaatitat allat, naafferartumik tamanut siammarneqartartut, nr. 1-imi 2-milu taaneqartunut naleqqersuuttumik nutaarsiassaqaqtitsivittut isikkoqarpata. Taamaalilluni naatsorsuutaavoq, pineqartut tassaasut paasissutissanik nutarfasissunik, aallakaatinneqannginnerminni aqqissorneqarsimasunik siammaassinerit, tamatumalu erseqqissumik nalileereerneratigut naatsorsuutigineqartariaqarpoq tusagassiornikkut annikinnerpaagaluaamilluunniit suliarineqarsimassasut, taamaanngippat pineqartoq tassaassamat allat oqaaseqaataannik issuaaneq, tak. issuaanerit pillugit

aaliangersagaq ataaniittoq. Aaliangersakkap annermik nutaarsiassaqaartitsivinnut digitaliusunut naleqquiullugu atorneqarsinnaanera takorloorneqarpoq, soorlu assersuutigalugu qarasaasiakkut nutaarsiassanut, tekst tv-mut nittartakkanullu il.il. § 1, nr. 3-p atorneqarnissaanut piunasaqaataavoq – soorlu naqitanut aamma radiukkut tv-kkullu ingerlatsivimmuut tamannattaq atuuttoq – inuk Kalaallit Nunaanniittoq akisussaatinneqarsinnaassasoq.

Saqqummersinniakkap avammuut siammarterneqarnissaanik piunasaqaat isumaqarpoq, tunngaviusumik kikkulluunniit, immaqa akiliillutik, saqqummersitap imarisaa takusinnaassagaat. Taamaalilluni suliffeqarfiup iluani paasissutissiiviit aaliangersakkap avataaniippuut, naak nutaarsiassaqaartitsivittut isikkoqarsinnaagaluarlutik, tassami sulisorisat kisimik takunnissinnaappuut.

Aammattaq piunasaqaataavoq, tamanut siammarterineq naafferartumik pisassasoq, soorluttaq ersertoq oqaatsip "naafferartumik" § 1, nr. 3-mi atorneqarnera § 1, nr. 1-mi atorneqarneraniit allaasoq, , tak. § 2, imm. 3. § 1, nr. 3-mi piunasaqaataavoq akuttoqatigiiaassuseqarnissaq, taamaalilluni naafferartumik siammarterisarnissamik piunasaqarneq isumaqarpoq, allanngorartuurtumik imaluunniit ataasiartumik siammarterinerit, tusagassiuuteqarnermi akisussaannermut inatsisitigut aqqissuussinerup ataaniinngimmata, tamatumalu assingaa dvd-mik, videomik saqqummersitsisoq immikkut akisussaannermik aaliangersakkat ataaniinngitsoq, taamatullu atuakkat elektroniskiusumik siammarterneqarunnartut taamaassanattitaaq. Kingulliullugu taaneqartup soorunami aamma assingaa, naqitatigut tusagassiornermi malittarisassat atuakkanut atuutinngimmata.

Nutaarsiassaqaartitsinerup tusagassiuutinut naqitanut imaluunniit radikkut tv-kkullu siammaassinernut sanilliunneqarsinnaanissaanik § 1, nr. 3-mi piunasaqaat aqqutigalugu, nutaarsiassaqaartitsilluni ingerlatsiviit qanoq ilusillit tusagassiuuteqarnikkut inatsisitigut malittarisassaliornermut ilaasutut isigineqarsinnaanerat killilerneqarpoq. Aammattaq piunasaqaat isumaqarpoq matumani pineqarmat illuatungaannaanut nalunaaruteqarneq, soorlu tamanna aammattaq naqitatigut tusagassiuutinut imaluunniit radiumik tv-millu ingerlatsinermut atuuttoq, tassami nutaarsiassaqaartitsinermi akisussaaffimmik inissiineq taamaallaat inunnut aaliangersimasunut killilerneqarsinnaavoq, tiguisoq imarisaasunut sunniuteqarsinnaanngikkaagat.

Nutaarsiassanik siammarterinerup pineqartussaananeramik apeqqummut atatillugu oqaatigineqassaaq, qulequttanut imaluunniit pitsaasutsimut tunngatillugu killilersuisoqarnissaa piunasaqaataanngimmat. Pingaaruteqartoq tassaavoq, tusagassiuummumut ilisarnaqutaanersoq imarisaani paasissutissiinerit paasissutissiisunit assigiinngitsuneersut amerlanerunersut.

Nutaarsiassaqaartitsinerup tusagassiuutinit naqitanit aamma radiukkut tv-kkullu siammaassinermut sanilliunneqarsinnaanissaanik piunasaqaatip nassatarivaa, tusagassiuutip siammaatassat nammineerlunisuliarisariaqarmagit, taamaalillunilu aqqissuinikkut toqqartorsimasariaqarmagit. Tusagassiaassaqaartitsineq taamaallaat nutaarsiassanik teknikkikkut siammaassinerusoq, tamanna pissutigalugu



aaliangersakkamut ilaassanngilaq. Aammattaaq apeqqut aaliangiivigineqassaaq ataatsimoortumik naliliinikkut.

Taamaattoq tusagassiuutit § 1, nr. 3-mi piumasaqaatinik toqqaannartumik naammassinnittutut isigineqarsinnaasut ingerlaannartumik siunnersuummut ilaannngillat, tassami ilassutaasumik piumasaqaataasussatut siunnersuutaavoq Tusagassiuutit pillugit Aaliangiisartut tusagassiuutup pineqartup ilaatinneqarnissaa aaliangersartassagaat, tak. siunnersuummi § 8, imm. 1.

## *§ 2-mut*

### Imm. 1-imut

Siunnersuummi § 2, imm. 1-mi naqiterisitsisoq suussusilerneqarpoq, tassaasoq allakkanik saqqummersitsinermi aningaasartuutunik matussusiisoq, ima paasineqarluni tusagassiinermik ingerlatsivimmik aningaasalersuisuusoq. Aaliangersagaq sunniuteqarpoq imm. 2-mi "nunap iluani"-k suussusiliinermi.

### Imm. 2-mut

Siunnersuummi § 2, imm. 2-mi siunnersuutigineqarpoq, allataq nunap iluaneersutut isigineqassasoq, naqiterisitsisup ingerlatsinera Kalaallit Nunaanni pippat. Allataq ilumut Kalaallit Nunaanni naqitaanersoq pillugu apeqqut taamaasilluni soqutiginaateqanngilaq. Allatat toqqaannartumik nunap iluaneersutut isigineqartut, nunap avataani naqinneqarsinnaapput, taamalu qarasaasianik il. il. atuinerit "nuna naqitsivik" nalorninarsisissinnaammassuk. Taamaattumik siunnersuutigineqarpoq, aalajangiisuussasoq naqiterisitsisoq, tassaasinnaasoq inuk ataaseq, ataatsimoorfik, aningaasaateqarfik, suliffik namminerisamik ingerlasoq il. il., ingerlatsivimminik nunami sumi ingerlatsinersoq. Sumi najugaqarneq aaliangiinermi tunngavittut atuisinnaanissaq ilimananngilaq, allatat tunngaviummik Kalaallit Nunaanni saqqummersinneqarsinnaammata, naqiterisitsisumit nunami allami najugalimmiit. Naqiterisitsisup ilumut nunami maani ingerlatsineranik apeqqut, ataatsimut isiginnilluni nalilernerqartariaqarpoq, taamaalillunilu nuna naqiterititsiviusoq tikkuussisutut atorneqarluni, soorlu suliffeqarfiup sumi najugaqarfeqarneranik apeqqut, pilersinneqarfia, nalunaarsorneqarfia aqqissuinermillu ingerlatsinerup sumiiffia nalilersuineri ilanngunneqarsinnaasut.

### Imm. 3-mut

Siunnersuummi imm. 3-mi allataq naafferartuq tassaatinneqarpoq allataq ikinnerpaamik ukiumut marloriarluni saqqummertussatut aaliangiunneqarsimasoq, taamalu ukiumut marloriarluni saqqummertarnissamik piumasaqaat annikinnerpaaffiliinerinnaalluni. Saqqummersittagaq aallarterlaaq ataasiaannarluni saqqummereersorlu ilanngussaa Tusagassiuutit pillugit Aaliangiisartunut naammagittaalliutigineqarpat, naafferartumik saqqummersartutut isigineqassaaq, pilersaarutaappat ukiup ataatsip ingerlanerani ikinnerpaamik ataasiarluni saqqummersinneqaaqqissasoq.

### *§ 3-mut*

#### Imm. 1-imut

Taaguut "akisussaasutut" aqqissuisoq atorqarpoq pissutigalugu allatat naafferartumik saqqummersartut arlaqartut paasissutissiinerminni aqqissuisut arlaqartut taasarmatigik, nalinginnaasumillu taaneqartut arlaat akisussaalluni aqqissuisutut taaneqartarluni. Aaliangersakkap erseqqissarpaa, inatsisip oqaasertaasa sinnerini, taaguut aqqissuisoq kisimi atorqartoq.

#### Imm. 2-mut

§ 3, imm. 2-mi oqaaseqatigiit erseqqissarniarpaat, qitiunngitsoq kina aaliangiinersoq imaluunniit kina aaliangiisimanersoq suliame aaliangersimasumi, taamaalilluni aqqissuisoq naafferartumik saqqummersitap imarisaanut tamarmiusumut akisussaavoq, apeqqutaanani saqqummersitap immikkoortuini assigiinngitsuni immikkut aqqissuisoqarsimanersoq, soorlu piorsarsimassuseq pillugu immikkoortumi imaluunniit timersorneq pillugu immikkoortumi. Erseqqissarneqarportaaq aqqissuisoq ataasinnaasinnaammat.

#### Imm. 3-mut

Aaliangersakkami imm. 3-mut tunngatillugu oqaatigineqassaaq, aqqissuisumik kinaassusiliineq eqqortuunngimmat, inuk taaneqartoq imm. 2 naapertorlugu oqartussaassuseqanngippat, taamaalillunilu taaneqartoq allatap imarisai pillugit inaarutaasumik aaliangiisinnaassuseqarani. Tassunga tunngatillugu akunnermiliuttumik taasaqarneq siunnersuummi § 53 naapertorlugu pineqaatissiissutaasinnaavoq, akerlianilli kukkusumik aqqissuisunngortinneqarsimasoq allatap imarisaanut akisussaananani, akisussaaffimmi taamaallaat aqqissuisuvimmiippoq. Taaneqartoq kingulleq aammattaaq akisussaassaaq, , siunnersuummi § 3, imm. 1 unioqqutillugu allatamut aqqissuisutut nalunaarutigineqarsimannikkaluaruniluunniit.

### *§ 4-mut*

Aaliangersakkap qularnaassavaa, inuup innarlerneqarsimasutut misigisup takusinnaassagaa unnerluussinerujunnartoq kimut tutsinneqassanersoq, tak. § 10 atuakkiortut pillugit, § 14 paasissutissiisut pillugit aamma § 27, imm. 1 pilerisaarisut pillugit.

### *§ 5-imut*

Siunnersuutigineqarpoq radiukku tv-kkullu ingerlatsiviit – allaassutit tusagassiuutit taakkua immikkut ilusaasa nassatarisaat ilaatillugit - allatatut naafferartumik nunap iluani saqqummersartutuulli, § 3 naapertorlugu pisussaaffeqassasut.

### Imm. 1-imut

Imm. 1-imi piumaffiginninneq peqquteqarpoq, innuttaasunut paasiuminaassinnaammat, radiukkut tv-kkullu ingerlatsiviit iluini kina akisussaasuulluni aaqqissuisuunersoq, taamaattumillu aaqqissuisut pisussaapput Tusagassiuutit pillugit Aaliangiisartunut nalunaarutiginnissallutik.

### Imm. 2-mut

Aaliangersakkami imm. 2-mi siunnersuutigineqarpoq, aaqqissuisoq nassuiarneqassasoq tassaatillugu, aallakaatitassiap imaluunniit ilanngussap saqqummiunneqarnissaanut inaarutaasumik aaliangiisinnaasoq. Taaguut aaqqissuisoq allatanut naqitanut atuuttut assigannik killilerneqarpoq,, tak. siunnersuummi § 3, imm. 2 aamma aaliangersaanermut tassunga oqaasertat qulaaniittut. Taamaalilluni piumasaqaataavoq, assersuutigalugu KNR-ip pisortaanera KNR-imut aaqqissuisuussasoq.

### Imm. 3-mut

Aaliangersakkami imm. 3-mi siunnersuutigineqarpoq, innuttaasoq kinaluunniit radiukkut tv-kkullu ingerlatsiviit inatsisip ataaniittunut saaffiginninnermigut piumasarisinnaagaa paasissallugu, ingerlatsivimmu kina aaqqissuisuunersoq. Piumasaqaat akuerineqanngippat, innuttaasoq paarlaallugu Tusagassiuutit pillugit Aaliangiisartunit paasitinneqarsinnaavoq, imm. 1-imi nalunaartussaataitaneq tunngavigalugu.

### Imm. 4-mut

Aaliangersakkami imm. 4-mi erseqqissarneqarpoq, amigartumik imaluunniit eqqunngitsumik aaqqissuisoq pillugu ilisimatitsinermi, kina akisussaaneersoq. Allatanut naafferartumik saqqummersartunut tunngatillugu aaqqiisimanermut assinguvoq, allaassutigiinnarlugu radiumik tv-millu ingerlatsiviup naqiterisitsisusooq taarsermagu.

## *§ 6-imut*

Aaliangersagaq immikkut radiumut tv-mullu piumaffiginninneruvoq, tunngaveqarlunilu tusagassiuutit taakku tigussaanninnerunerannik. Tusarnaartup imaluunniit isiginnaartup aallakaatitap ilanngussalluunniip imaanit innarligaasutut misigisisup, aaliangersagaq naapertorlugu ajornanngikannersumik paasisinnaavaa, kikkut akisussaasutut inissisimasuusinnaanersut, taamalu unnerluussineq kimut tutsinneqarsinnaanersooq. Tassunga atsumik oqaatigineqassaaq, aaqqissuisup paasissutissisussaataitanera, taamaallaat inunnu paasissutissanik pineqartunik piniarnissaminut inatsisitigut soqutigisaqartuusunut atuummat. Innarlerneqarsimasup uppernarsartussaavaa, inatsisitigut soqutigisaqartuunissamik piumasaqaat eqquutillugu; taamaattumik pineqartup aallakaatitap imal. ilanngussaq pineqartoq pillugu tamakkiisuunngikkaluamik erseqqissaasinnaasariaqarpoq.

Taamaattorli aaliangersakkap iluaniinngilaq, innarligaasup piumasarisinnagaa aallakaatitap nuutinneranik tunineqarnissani.

Ilanngussamik oqarnermi pineqarput, aallakaatitassiamut atasumik ilaannakortumik ilanngussat.

## *§ 7-imut*

### Imm. 1-imut

Imm. 1-imi siunnersuutigineqarpoq, aaqqissuisoq pisussaafilerneqassasoq aallakaatitap nuutinnerinik toqqorsisarnissaanut, tassuunakkut aallakaatitap aaliangersimasup imarisaa pillugu uppersaasooqarsinnaaqullugu. Aaliangersagaq radiumik tv-millu ingerlatsineq pillugu peqqussummi § 17-imut ilaatigut assinguvoq.

### Imm. 2-mut

Toqqorsinissamik pisussaaffik qaammatinut pingasunut killiligaavoq, piffissaliussarli taanna qaangiutsinnagu aallakaatitaq pillugu naammagittaalliortoqarpat, aallakaatitap nuutinnera toqqorsimaneqassaaq suliap naammassinissaata tungaanut, tak. aaliangersakkami imm. 2. Suliaq inaarutaasumik naammassisimasutut isigineqassaaq, radiumik tv-milluunniit ingerlatsiviup naammagittaalliummut akissutaa, Tusagassiuutit pillugit Aaliangiisartunut imaluunniit eqqartuussivinnut apuunneqanngippat, radiumik tv-milluunniit ingerlatsiviup akissutaata naammagittaallortumit tiguneqarneraniit qaammatit pingasut qaangiutsinnagit. Tassunga atasumik oqaatigineqassaaq, naammagittaaliornissamat piffissaliussaq sapaatip-akunnerinik sisamanik sivilissuseqarmat, naammagittaallortup naammagittaalliutimi itigartinneqarnera imaluunniit akerriliiinarnermi itigartinneqarnera Tusagassiuutit pillugit Aaliangiisartunut tunniukkumappagu, tak. siunnersuummi § 34, imm. 3, aamma § 40. Kisianni aamma naammagittaallortup itigartitaanini eqqartuussivimmuut tunniussinnaammagit, eqqortuunerusutut isigineqarpoq malittarisassamik nalinginnaasumik aalajangersaanisaaq, toqqortarinninnissamik piffissaliussaq radiukkut tv-kkullu ingerlatsiviup itigartitsinerata naammagittaallortumut anngunneraniit imaluunniit akerriliiinerup naammagineqanngitsumik saqqummiunneqarneraniit qaammatit pingasunngorlugit. Toqqortarinninnissamik pisussaaffik ingerlaannassaaq, Tusagassiuutit pillugit Aaliangiisartunit imaluunniit eqqartuussivinnit suliaq ingerlanneqartillugu. Naammagittaallortoq una aaliangersagaq tunngavigalugu aammattaaq aallakaatitap nuutinneranik pinissaminik piunasaqarsinnaanngilaq.

## *§ 8-mut*

### Imm. 1-imut

Aaliangersakkap, tusagassiuutit digitaliusut nutaarsiassaqaqtitsinermik ingerlatsisut, tusagassiornermi aaliangersakkat ataannut inississannut periarfissat annertusivai, soorlu qarasaasiakkut nutaarsiassat, tekst-tv aamma nittartakkat, tassami siunnersuutigineqarpoq siunissami Kalaallit Nunaanni Tusagassiuutit pillugit Aaliangiisartut aaliangertassagaat, ingerlatsiviit taama ittut malittarisassat ataanniissanersut.

#### Imm. 2-mut

Imm. 2-mi siunnersuutigineqarpoq Tusagassiuutit pillugit Aaliangiisartunit aaliangerneqarsimappat tusagassiuinermik ingerlatsivik pineqartoq inatsisip ataaniissasoq, tamatuma assigingaa tusagassiuutip §§ 5-6-mi malittarisassat ataaniilnera, taamaalilluni tusagassiuutip pineqartup Tusagassiuutit pillugit Aaliangiisartunut nalunaarutigissavaa kina aqqissuisumut pisariaqartumik oqartussaassuseqarluni inissisimanersoq. Ingerlatsivinni taakkunani aqqissuisutut inissisimasoqaannarsinnaavoq, taamaalilluni kialluunniit tusagassiuinermi ingerlatsivimmuut saaffiginninnermigut piumasarisinnaavaa, aqqissuisup kinaanerani paasitinneqarnissani, soorluttaaq aqqissuisup kinaanerani eqqunngitsumik paasissutissiinnermut akisussaaffik ingerlatsivimmuut aqqissuisumullu tutsinneqartussaasoq. Kiisalu inuk eqqunngitsumik aqqissuisutut nalunaarutigineqarsimasoq akisussaatinneqassaaq, nalunaarutiginninneq pineqartup akuersineratigut pisimappat.

#### Imm. 3-mut

Imm. 3-mi siunnersuutigineqarpoq, Tusagassiuutit pillugit Aaliangiisartut assersuutigalugu qarasaasiakkut nutaarsiassaqaqtitsiviup inatsisip ataaniinnerani aaliangiisinnaanissamik pisinnaatitaaffeqarneranni piumasaqaataassasoq, tusagassiuinermik ingerlatsiviup pineqartup § 1, nr. 3-mi qallikkut piumasaqaatit eqqutissagai. Taamaalilluni Tusagassiuutit pillugit Aaliangiisartut aaliangersinnaanngilaat, ingerlatsivik nutaarsiassanik teknikkikkut ingerlatitseqqiinerinnarmik, ingerlateqqitanut naleqqiullugu minnerpaamilluunniit namminerisamik suliarineqanngitsunik allatulluunniit aqqissugaanngitsunik ingerlatsisoq, malittarisassat iluanniitinneqassasoq.

#### *§ 9-mut*

#### Imm. 1-imut

Imm. 1-imi siunnersuutigineqarpoq, akisussaatinneqarsinnaasut pingaarnertut allaaserinnittumut, aqqissuisumut naqiterisitsisumullu killilerneqassasut. Taamaalilluni aaliangersakkap nassatarivaa, pinerluttaalisitsinermut inatsisip § 9-ani peqataanermut akisussaaneq pillugu nalinginnaasumik malittarisassat atorineqannginnerat. Aaliangersakkap nalunaarsunngilaa, inuit pineqartut pingasuusut ilaata ataatsip amerlanerilluunniit akisussaatinneqarnissaannut piumasaqaatit ersarinnerusut suunersut, taakkununga atillugu §§ 10-15 innersuunneqarput.

### Imm. 2-mut

Imm. 2-mi erseqqissarneqarpoq, allatat pillugit malittarisassat aammattaaq assilisanut saqqummiusanullu taakkununga assingusunut atuummata.

### Imm. 3-mut

Imm. 3-mi aaliangersakkap nassatarivaa, agguaattakkat, nivinngagassat il. il. akisussaanermut aaliangersakkanut allatamut attuumassuteqarfigisaminnut atuuttunut ilaammata, naafferartumik saqqummersartutut isigineqarsinnaanngikkaluarunilluunniit,. Taamaalilluni aviisip ullormut saqqummersartup imarisani pillugit saqqummiussaani, atertaqartinneqanngitsumik nalunaarut inatsisinik unioqqutitsisoq, aviisip aaqqissuisuanut akisussaaffigitinneqarsinnaavoq.

## *§ 10-mut*

### Imm. 1-imut

Imm. 1-imi oqaaseqatigiit malitsigivaat, utoqqatsissutigineqarsinnaasut inummut tunngasut, soorlu inummut tutsitsisinnaanngissuseq imaluunniit inuup naatsorsuutigineqarsinnaannginera allatup akisussaatinneqannginneranik nassataqarsinnaammata. Pinerluttaalisitsinermi tunngaviusumik malittarisassat nalinginnaasut naapertorlugit, aamma akisussaannginnissamut qallikkut peqquataasinnaasut allaaserinnittumit tunngavigineqarsinnaapput. Taamatutaaq suliaassanngortitsineq pineqaatissinneqannginnermik kinguneqarsinnaavoq tamanna uppernarsarneqarpat, imaluunniit unioqqutitsisoq ajortumik isumaqarani iliuuseqarsimappat, aammalu nalornaatsumik nalinginnaasumik innuttaasunut soqutiginaateqarpat. Taamatutaaq nalunaarummik imaluunniit assilisamik allanit susassarineqanngitsutut isikkulimmik avammut saqqummiineq peqquataasarsinnaappat, siammaaneq pineqaatissiinermik kinguneqassanngilaq.

Inatsisitiliornermi nalinginnaasumik malittarisassat tamarmik tassaapput inatsisiliornermi malittarisassat Kalaallit Nunaannut attuumassuteqartut. Pingaarnertut pineqarput pinerluttaalisitsinermi inatsimmi aaliangersakkat, aammali piginitussaataitanermut tunngatillugu malittarisassat, kiisalu taarsissuteqartarneq pillugu nalinginnaasumik malittarisassat.

### Imm. 2-mut

Imm. 2-mi siunnersuutigineqarpoq, allaaserisaq atertaqartinneqartutut isigineqassasoq, allaaserinnittoq atini assiniluunniit ilaatillugit allaaserisaq saqqummiunnissaanut isumaqataasimappat. Taamatutaaq ippoq, allaaserisaq saqqummiunneqarpat allaaserinnittup aterusia ilisarnaataaluunniit atorlugu, aammalu nalinginnaasumik ilisimaneqarpat, ateruseq ilisarnaalluunniit inuup kia atortarneraa.

Atimik taasineq ima erseqqitsigissaaq, atuortoq annertunerusumik misissueqqaanngikkaluarluni allaaserinnittumik kinaassusersinnaassalluni. Allaaserinnittup atia najugaqarfialu tamakkiisoq allassimappat, atertaqartitsinissamik piunasaqaatit naammassineqarsimassapput. Taamatuttaaq ippoq, sumi najugaqarneq ilaannikkaluartorluunniit, assersuutigalugu ateq immikkut ittuuppat aammalu allaaserisap imarisaa imaluunniit pissutsit allat paasisutissiippata, allaaserinnittoq ajornaquteqanngitsumik kinaassusersineqarsinnaanngorlugu. Taamaanngippat, aterlu nalinginnaasuuppat, allaaserisaaq atertaqartinneqanngitsutut isigineqassaaq, allatigut pissutsit immikkut ittut ajornaquteqanngitsumik kinaassusiliinissamut periarfissiinngippata, tamannalu allaaserinnittumut aamma ersarippat. Immikkut ittumik takussutissat tassaasinnaapput atorfirmut taaguut, soorlu tusagassiorloq C.B., arsartartoq M.D. imaluunniit ilisimatoq C.N. Tamanna aamma atuuppoq nalinginnaasumik inuit ilisimaneqartut nalinginnaasumillu ateqartut atorfirmik taaguuserneqanngitsut, imarisaa ersarissumik inummut tassunga tikkuussippat.

Allaaserisaaq atimut sumilu najugaqarnermut taarsiullugu allaaserinnittumik assitaligaq, atertaqartinneqartutut isigineqassaaq, allaaserinnittup naatsorsuutigisinnaammagu ajornaquteqanngitsumik kinaassusersineqarnissi.

Aammattaaq siunnersuutigineqarpoq, atertaqartinneqartitsinissamik piunasaqaat naammassineqartutut isigineqassasoq, allaaserisaaq ateruseq ilisarnaalluunniit atorlugu atsiorneqarpat aammalu nalinginnaasumik ilisimaneqarpat, kia ateruseq ilisarnaalluunniit atortarneraa. Tassani aamma allaaserinnittup kinaassusersineqarsinnaani ersarissumik paasisimasariaqarpaa, tamannalu pillugu allaaserinnittoq akisussaatinneqartariaqarluni. Naapertuuttuunaviannigilaq inuit ateruseq atugartik nalinginnaasumik ilisimaneqartilersimasartik atorlugu, akisussaassuseqanngitsumik eqqissisimatinneqartussaannikkut ataqinassusikkulluunniit innarliippata, soqutiginaq tamarmik ilisimagaat innarliineq kimit piliarineqartoq. Taama pisuni naammappoq, innuttaasut amerlasuut ilisimappassuk kina allaaserinnittuusooq.

Allaaserisaaq atertaqartillugu il.il. saqqummiunnissaanut akuersineq pissusissamisuuqinnartutut isigineqarpoq, tamatumani piunasaqaatit pisuni allanisut paasineqassallutik, taamaammattakuersinerup ilusissaa pillugu immikkut piunasaqaateqartoqanngilaq, soorlu allakkatigoortinnissaanik piunasaqartoqarani. Taamaalilluni aamma oqaasertaqanngitsumik akuersineq naammassinnaavoq. Allaaserisaaq kukkunikkut imaluunniit allaaserinnittup kissaataa uniorlugu atertaqartinneqarpat assitalerneqarluniluunniit, allaaserisaaq atertaqartinneqartutut isigineqassanngilaq, taamalu allaaserinnittoq akisussaatinneqassanani.

Atertaqartitsinerup nassuiarneqarnera naapertorlugu, ilaanneeriarluni ima pisoqarsinnaavoq inuup innarlugaasutut misigisup, toqqaannartumik allaaserinnittoq ilisarissinnaanagu, allaaserinnittumik eqqartuussisunut tunniussinisaaminut imaluunniit pinerluttaalisitsinermi inatsit naapertorlugu suliassanngortitsinissaminut atorsinnaasaminik. Taamaammatt § 10-mi aaiangersakkat siunnersuummi § 4-mi malitarisassanut sanilliutariaqarput, taakkua malillugit aqqissuisup qinnuigineqaruni inuit § 10-mi pineqartut kikkunerat ilisimatitsissutigisussaammagu.

### Imm. 3-mut

Imm. 3-mi siunnersuutigineqarpoq, allaaserisamut atertaqartitamut akisussaaffik allaaserinnittunut tamanut tutsineqassasoq, takuneqarsinnaanngippat allaaserisap immikkoortui sorliit kimit allataanersut. Pisuni taama ittuni akisussaatsineq tamanut atimikkut allaaserinnittut ilanngunneqarnissaminut akuerseqataasunut atuuttariaqarpoq. Allaaserisanut arlalinnit allanneqarsimasunit ateq ataaseq kisimi atorineqarpat, allaaserinnittoq atikkut taaneqartoq allaaserisap imarisaanut tamakkiisumik akisussaassaaq. Taamatuttaaq allaaserinnittoq atikkut taasaq allaaserisaminut assilisaq kimit tigusaanerani taaneqanngitsoq ilanngukkuniuk, taannalu eqqissisimatinneqarnissamik innarliippat, allaaserisamut assitaliisooq saqqummiinermut akisussaatinneqassaaq.

Pinerluttaalisitsinermi aaliangersakkat nalinginnaasut naapertorlugit unioqquitsinermit tunngatillugu inummut tutsisisinnaanissamik piunasaqaat taamaalilluni aamma allaaserinnittup akisussaananut atuuppoq, taannalu aaliangersagaq aqputigalugu allaaserinnittut, assiliisunut ilaalu ilanngullugit toqqartumik pinerluttaalisitsinermi akisussaaffiliineq eqqunneqanngilaq.

### Imm. 4-mut

Siunnersuummi § 10, imm. 4-mi pineqarpoq, allaaserisap inatsisitigut inuttut isigineqartumeenera, soorlu peqatigiiffimmit, taassuma siulersuisunit, ataatsimoorfinnit allatulluunniit suleqatigiinnit. Ullumikkut inatsisitigut inuttut isigineqartut akiliisussanngortitaasernerisa nalinginnaasuunerata ataatsimoorlutik suleqatigiit pinerluttaalisitsinermi inatsisit aqputigalugit akisussaatinneqarsinnaanissaat illersorneqarsinnaavoq. Tassunga atasumik imm. 4-mi siunnersuutigineqarpoq, inatsisitigut inuttut isigineqartup aqutsorisai pisuni taama ittuni akisussaatinneqartarnissaat, kisiannili aamma ataatsimoorlutik suleqatigiit akisussaatinneqarsinnaanissaat periarfissaqartillugu.

Inatsisitigut inuttut isigineqartut allaaserisanik, atuartut allagaannik il.il. allaaserinnittuusinnaasut assigiinngitsuusinnaapput. Ilaanneeriarluni tassaasarpit inuutissariutinik ingerlatsiviit imaluunniit suliamut atatillugu kattuffiit, tusagassiuutit aqputigalugit isummaminnik saqqummiussiumasut, allatigulli tassaasarlutik peqatigiiffiit mikinerusut, soorlu inissiaatileqatigiiffik, siulersuisut taakkunungalu ilaasortaasut saniatigut toqqaannartumik allaffissornikkut aqunneqangitsut. Taaguut "inuup inatsisitigut oqartussaasup pisortai" imm. 4-mi atorineqartoq tamanut atuuppoq. Taamaalilluni akisussaaffiup siulersuisuni ilaasortanut ataasiakkaanut aamma/imaluunniit qullersaasunut inissinneqarnissaanut pissusiviusut apeqqutaassapput. Oqaatigineqassaaq aaliangersakkami, allaaserinnittut akisussaaffeqarnertuulli, tak. siunnersuummi § 10, imm. 1, piunasaqataammat siulersuisunut ilaasortat aamma/imaluunniit qullersat inummut tutsisisoqarsinnaanissaanik piunasaqaat naammassisimassagaat.

### imm. 5-imut



§ 10, imm. 5-imi siunnersuumi aaliangersagaq isumaqarpoq, allataq nutaarsiassaqaqtitsivik paasissutissiisoralugu saqqummersinneqartoq, allatatut atertaqaartinneqartutut isigineqanngimmat, tusagassiuineq pillugu inatsiseqarneq naapertorlugu. Taamaammata aviiisip ullormut saqqummersartup allatamik taamaattumik saqqummiineranut akisussaasua tassaavoq aviiisip aqqissuisua. Nutaarsiassaqaqtitsiviup aqqissuisuata allatap atuagassiamut ullormut saqqummersartumut ingerlateqqinnera akisussaaffigaa, aammalu nutaarsiassaqaqtitsiviup saqqummiinerata toqqaannartumik tamanut saqqummiinertaa akisussaaffigalugu, soorlu telegrammit imaluunniit telefonikkut nutaarsiassaqaqtitsinerit. Aaliangersagaq tunngaveqarpoq, nutaarsiassaqaqtitsivinnit nutaarsiassat massakkut tusagassiornermi akisussaafitsigut aaliangersaanerit ataaniilermata, inatsisissatut siunnersuummi § 1, nr. 1-imi, tak. § 8, imm. 1 aamma 3, piumasaaqatit eqqortinneqarsimappata.

### *§ 11-imut*

#### Imm. 1-imut

Siunnersuummi § 11, imm. 1-ikkut aaliangersakkap nassatarivaa, allaaserisamik atertaqaartinneqanngitsumik atuagassiatigut saqqummiussap imarisaanut aqqissuisoq akisussaasusooq, aqqissuisoq piaarisutut eqqumaniangitsutulluunniit oqaatigineqarsinnaanngikkaluarpalluunniit. Aqqissuisoq taamaalilluni nammineq pisuussuteqaanngikkaluarluni akisussaatinneqarpoq. Amerlasuutigut aqqissuisut allattaat tassaasarpooq allaaserisap atertaqaartinneqanngitsup saqqummiunissaanik ersarissumik aalajangiisuusooq, kisianni § 9, imm. 1-imi malittarisassap aqqissusut allattaata akisussaatinneqarsinnaannginnera ersersippaa. Allaaserisat atertaqaartinneqanngitsut tassaapput allaaserisat sunnguamilluunniit allaaserinnittup kinaassusaanik paasissutissartaqanngitsut, aamma allaaserisat allaaserinnittup aqqanik, assinganik imaluunniit innuttaasunit ilisimanilimmik aterusianik ilisarnaasigaagaluarlutik, allaaserinnittoq akuersiteqqaarnagu saqqummiunneqartut. Atuartartumit allaaserisaaq ilanngussaaq salluliut tassaasooq, kinaassusersineqanngitsumit nassiusaaq, taassumangalu inuup allap aqqa atorlugu atsiorneqarsimasooq, ateq taanna atorlugu saqqummiunneqaruni allaaserisatut atertaqaartinneqanngitsutut isigineqassaaq. Tamannattaaq atuuppoq atuartartup allagaanut atimik piunngitsumik atertaqaartinneqartutut apuussamut saqqummiunneqartumullu.

Qulequttat, saqqaani quppernertut innersuussutit, allaaserisap imarisaa pillugu takussutissiat assigisaallu, tunngaviusumik amerlanertigut allaaserisap atertaqaartinneqanngitsup ilaatut isigineqartariaqarput. Allaaserisamulli atertaqaartinneqartumut saqqummiunneqartumullu allaaserinnittup qulequtaq nammineq allasimappagu, qulequtaq allaaserisap atertaqaartinneqartup ilaatut isigineqassaaq, taamalu § 10-p ataaniissalluni. Taamatutaaq ippoq, allaaserisamut atertaqaartinneqartumut qulequtaq allaaserinnittumit allataanngippat, allaaserisalli imarisaanut tamakkiisumik naapertuulluni. Erseqqissarneqartariaqarpoq, aqqissuisup akisussaatinneqarnera killilerneqarmat nammineq pisuutinnani akisussaataanninnissamut patsisiliunneqarsinnaasunik, § 10, imm. 1-imut

oqaaseqaatini eqqaaneqartutut allaaserinnittup akisussaatitaannginneranik nassataqarsinnaasunik. Taamaasilluni aaqqissuisoq nalinginnaasumik ataqqinassusiiiasumik saqqummiinnermut akisussaassanngilaq, ilumoortuunera uppersarsarneqarsimappat, imaluunniit nalunaarummik imaluunniit assilisamik inuit allat susassarinnngisaannik tunngavissalittut isigineqartumik saqqummiiguni.

§ 11, imm. 1 naapertorlugu aaqqissuisup akisussaananut ilaavortaaq, allaaserisaq atertaqartinneqartoq atertaqartinneqanngitsorluunniit imminermini tigussaasumik ajuallatsitsinngikkaluartoq, assersuutigalugu assitaa imaluunniit atuagassiami tassani allaaserisaq alla allaaserinnitumit allamit suliaasoq, akisussaatitsinnaasumik unioqqutitsinertaqarpat. Assersuutitut taaneqarsinnaavoq pinnerluuteqarnermi suliamut atasumik eqqartuussivik peqqusippat, unnerluussap aqqa, atorfia najugaaluunniit avammut saqqummiunneqassanngitsut. Kingunerisaani tusagassiorloq allaaserinnikkuni unnerluussaasup kinaassusaanik qulaajaanngitsumik, kisiannili atuagassiap ilaani assersuutigalugu unnerluutigisap assinga takuneqarsinnaalluni, allaaserisap assilissallu ataatsimut paasissutissiinerat tunngavigalugit kinaassusersineqarsinnaalluni. Taama pisoqartillugu § 11, imm. 1 naapertorlugu kinaassutsimik saqqummeeqqusinnnginnermik unioqqutitsisutut aaqqissuisoq akisussaatinneqassaaq.

#### Imm. 2-mut

Siunnersuummi § 11, imm. 2-mut atasumik oqaatigineqassaaq, aaqqissuisup akisussaaffiit ilaanngimmata, allaaserinnittup piaarinermik imaluunniit eqqumaniannngippallaarnermik akisussaatitaaffiginnngisai.

#### *§ 12-imut*

§ 12-mi pisoq pineqartoq tassaavoq, tusagassiuutikkut allaaserisamik allamilluunniit tusagassiummit allameersumit issuaasoqarpat. Aaliangersaaneq isumaqarpoq, issuaaneq atertaqartinneqanngippat, aaqqissuisumut tutsitsisinnaaneq atuummat § 11 naapertorlugu.

Tusagassiummi nutaami saqqummiuteqqinnerani allaaserisaq atertaqartinneqarpat, § 12-p malitsigissavaa imarisaanut aaqqissuisoq akisussaavoq, allaaserinnittup tusagassiuutikkut nutaakkut allaaserisap saqqummiunneqarnissaa akuersisimannngippagu. Allaaserinnittoq atertaqartinneqartoq siammartereqqinnermut toqqaannartumik akisussaatinneqaannarsinnaanngilaq. Malittarisassaq isigineqassaaq siunnersuummi § 10, imm. 5-imut atatillugu aammalu § 11-imut taputartuullugu, tassuunakkut tusagassiummut nutaamut aaqqissuisoq, allaaserisanut nutaarsiassaqaqtitsivinniit aqqatigut taasaneersuunerarlugit saqqummiunneqartunut akisussaassaaq, nutaarsiassaqaqtitsiviulli aaqqissuisua akisussaassalluni nutaarsiassaqaqtitsiviup nammineq allaaserisaanut atertaqartinneqanngitsunik saqqummiunneqartunut.

#### *§ 13-imut*

Aaliangersakkap sammivaa, allaaserisat atertaqartinneqartut imarisaannut aaqqissuisup akisussaaqataanera, tassami siunnersuutigineqarpoq aaqqissuisoq akisussaaqataassasoq allaaserisap atertaqartinneqartup atuagassiakkut saqqummiunneqartup imarisaanut, aaqqissuisup ilisimasaanik sulisumit atorfilittamit allanneqarsimappat, aaqqissuisup kaammattuineragut allatulluunniit aaqqissuisup peqataaffigisaanik, imaluunniit aaqqissuisup ilisimasimappagu imarisai eqqunngitsuusut. Taamaalilluni aaliangersakkami pineqanngillat, ajuallatsitsimasutut unnerluussinerit eqqortuuneri eqqortuunngineriluunniit aaqqissuisup ilisimanngisai. Allaaserinnittoq taannaavoq siulliulluni uppernarsaasusaaq, allaaserisami atertaqartinneqartumi innarliissutaasut pillugit.

#### *§ 14-imut*

Aaliangersakkap sammivaa apersuinerni, imaqarniliornerni il. il. oqaaseqaatit issuarneqartarnerat. Pinerluttaalisitsinermi inatsit naapertorlugu, akisussaatisisoqarsinnaavoq oqaaseqaatit aaliangersimasut oqaatigineqarnerpiaannut atasumik. § 14-imi aaliangersaq isumaqarpoq, pinerluttaalisitsinermi inatsisip ataanut atasumik oqaaseqartoq, piumasagaatit aaliangersimasut iluini aamma tusagassiornermi akisussaaneq pillugit aaliangersakkat ataanni ingerlatitseqqiinnermut akisussaatinneqarsinnaasoq.

Siunnersuutip taamaalilluni imaraa, nalunaaruteqartoq imaluunniit paasissutissiisoq aqqatigut taasaq tusagassiornermi aaliangersakkat naapertorlugit akisussaatinneqarsinnaasoq, taamaappallu oqaaseqaatinut avammut saqqummiussanut akisussaaqataatinneqassasoq, allaaserisamut atertaqartinneqartumut oqaaseqaatinik ilanngussisutut allattoq peqatigalugu, tak. § 10-mi malittarisassat, imaluunniit allaaserisat atertaqartinneqanngippat aaqqissuisoq akisussaaqatigissallugu, tak. § 11. Innarlerneqartutut misigisimasup nammineq aaliangiinini tunngavigalugu inuttut eqqartuussivimmuut tunniussisinnaanermut aaliangersakkat naapertorlugit saqqummiussisoq aamma allaaserinnittoq imaluunniit aaqqissuisoq imaluunniit taaneqartut arlaat eqqartuussivimmuut tunniussinnaavaa.

Akisussaaqataatinneqarsinnaanermulli piumasagaataavoq, oqaaseqaat eqqortumik issuarneqarsimassasoq, aammalu oqaaseqaatip aallaaviata akuerisimassagaa, oqaaseqaatip atertaqartillugu saqqummiuteqqinneqarnissaa. Kingulliullugu taaneqartoq isumaqarpoq, pineqartup saqqummiiniarneq akuerisimassagaa. Piumasagaatit taakkua eqqortinneqarsimanerisa uppernarsinissaat allaaserinnittup imaluunniit aaqqissuisup pisussaaffigaat. Uppernarsaaneq pisinnaanngippat, akisussatinneqarsinnaapput allaaserinnittoq aaqqissuisorlu kisimik imaluunniit taakku arlaat.

Tassunga atasumik oqaatigineqassaaq, naak inatsisissatut siunnersuummi § 10-mi allaaserinnittup atertaqartinneqartup akisussaaffia pillugu malittarisassaaq pingaarneq naapertorlugu, tusagassiorloq akisussaagaluartoq, ilanneeriarluni akisussaatinneqanngitsoorsinnaammat, oqaaseqaatip nutaarsiassatut paasissutissatullu pingaaruteqarnera pillugu, tamannalu pillugu tassa ilaatigut pineqartoq akisussaannngitsutut isigineqarsinnaalluni. Taanna

akisussaatisinngissinnaaneq allaaserinnittuinnarmut tunnganngilaq, tassa tusagassiortumuinnaq, pisulli apequtaallutik aaqqissuisumut imaluunniit oqaaseqaammik issuaavigineqartumut atorneqarsinnaalluni.

### *§ 15-imut*

#### Imm. 1-imut

Aaliangersakkap naqiterisitsisoq atuagassiap imarisaanut akisussaattippaa, §§ 11-miit 13-imut aaliangersakkat naapertorlugit aaqqissuisoq akisussaatinneqarsinnaatinnagu.

Siunnersuutigineqarpoq, naqiterisitsisoq aaqqissuisumut taarsiullugu akisussaatinneqartuaannassasoq, aaqqissuisoq akisussaatinneqarsinnaatinnagu, amigartumik imaluunniit kukkusumik aaqqissuisoq nalunaarutigineqarsimatillugu, imaluunniit aaqqissuisup Kalaallit Nunaannut attuumassuteqarnerata killeqarnera peqqutigalugu imaluunniit tarnikkut naatsorsuutigiuminaatsuunera pillugu. Tamanna tunngavilersorneqarpoq, pissutsit tamakku naqiterisitsisumit pinaveersaartinneqarsinnaammata.

#### Imm. 2-mut

Naqiterisitsisoq inatsisitigut inuttut isigineqarpat, taanna taamaatut akisussaatinneqassaaq.

### *§ 16-imut*

Qulaani nalinginnaasumik oqaasertani nassuiarneqarput pingaarnertut akisussaaffiit pillugit malittarisassat assigiinngitsut immikkoorutaat, tassa naafferartumik atuagassiat saqqummersartut eqqarsaatigalugit, aammalu radiukkut tv-kkullu aallakaatitanut atasumik eqqunneqartussatut siunnersuutaasut.

#### Imm. 1-imut

Siunnersuummi § 16, imm. 1-imi killiliineq pivoq, § 9, imm. 1-imi killiliineq assigalugu kikkut akisussaatinneqarsinnaanersut erseqqissarneqarpoq. Kisianni radiukkut tv-kkullu aallakaatitat imaanut tunngatillugu allaaserinnittumik suussusiliineq annikippallaartutut isigineqarsorineqarnera qissimillugu killiliisoqarpoq. Taamaattumik inuit akisussaatinneqarsinnaasut amerlineqarput, naafferartumik atuagassiat saqqummersinneqartartut assigalugit allatamik allaaserinnittoq pineqarluni, aammali oqaaseqaammik saqqummiisoq pineqarluni. Radiukkut tv-kkullu aallakaatitat imaanut akisussaaneq taamaasilluni assinguvoq, tusagassiornermi inatsisinik unioqquitsinermi tigussaasumik suussusiliinernut, allakkat oqaaseqaatillu eqqarsaatigalugit. Akisussaatinneqarsinnaasut aammattaaq naafferartumik atuagassiani saqqummersartunisut ippoq, tassa aaqqissuisoq, aammalu naqiterisitsisumut taarsiullugu radiukkut tv-kkullu ingerlatsivik. Aaliangersakkap imaraa, pinerluttaalisitsinermik inatsit naapertorlugu

nalinginnaasumik peqataanikkut akisussaatinneqartarnerit atuutinngimmata, siunnersuummi § 20, imm. 2-mi pissutsit taaneqartut pinnagit. Aaliangersakkap qaqugukkut akisussaatisoqartarnissaanut piumasaqaatit erseqqissanngilai, tassanilu innersuussutigineqassapput §§ 17-imiit 23 ilanngullugu.

### Imm. 2-mut

Siunnersuummi § 9, imm. 2 naapertorlugu § 16, imm. 2-mi siunnersuutigineqarpoq, radiukkut tv-kkullu aallakaatitani allatat oqaaseqaatillu pillugit immikkut akisussaaneq pillugu malittarisassat, filminut, assilisanut assigisaannullu atuutissasut.

Atuagassiat nunap iluani naafferartumik saqqummersartut eqqarsaatigalugit, siunnersuummi § 9, imm. 3-p erseqqissarpaa, agguaattakkat, nivinngartakkat assigisaallu, innersuussinermikkut imaluunniit iluaniinnermikkut atuagassiap ilaatut isigineqartut. Aaliangersagaq taanna siunnersuutigineqarpoq ilanngunneqassasoq, agguaattakkat ilaalu ilanngullugit taaneqartut, naafferartumik atuagassianut atasumik akisussaaffitsigut maleruagassanut ilaatinneqassasut, amerlasuutigut naafferartumik atuagassiatut isigineqartarnaviannngimmata. Radiukkut tv-kkullu aallakaatit eqqarsaatigalugit pisariaqarsorineqanngilaq, taakkunani imarisaq pinerit tamaasa radio tv-lu pillugit akisussaaffik pillugu aaliangersaanerit ataanni ittuassammat. Tassani pineqarputtaaq qilanaartuutit pilerisaarutitulluunniit aallakaatitamit siammarterneqartussamit tigulaarinninnerit.

## *§ 17-imut*

### Imm. 1-imut

Aaliangersakkap pivaa allatanut akisussaaneq taamalu naafferartumik atuagassiat saqqummersartuni allaaserinnittup akisussaanaera pillugu siunnersuummi § 10-mut naapertuulluni.

Radiukkut tv-kkullu aallakaatitanut atasumik oqaatigineqassaaq, taakku pisinnaammata radiukkut tv-kkullu ingerlatsiviup avataaniit toqqaannartumik aallakaatitsinertut, soorlu naalakkersuineq pillugu ataatsimiinnernit, naalagiarnernit, timersornerniit assigisaanillu, imaluunniit ingerlatsiviup iluani aallakaatitsivimmiit apersuinerit aammalu oqaloqatigiinnerit, soorluttaaq aallakaatitat avammut siammarneqanerit sioqqullugu immiunneqarsimasut imaluunniit atortorissaarutit sarfatortuusut atorlugit toqqortarineqarsimasut, taamalu aallakaatitatut toqqaannartuunngitsut.

Radiukkut aallakaatitani allatat atuarnerisigut saqqummiunneqartarput, tamannalu nalinginnaasuullunittaaq tv-kkut aallakaatitani, tassanilu aamma pisinnaasarpoq, allatat saqqummiunneqartarlutik isiginnaartartunit atuarneqarsinnaasunngorlugit.

Allataq atuarneqartoq allanneqarsimasinnaavoq tamanna siunertaralugu, taakkuukkajuttarpullu tusagassiornermi najoqqutassiatut allatat, aallakaatitsivimmi

sulisuusup atuartagai, ilanngussanik assigiinngitsunik uiguleriisitsisuusut imaluunniit ilanngussassamut tullermut nalunaarutaasut. Kisianni aamma allataq allanneqarsimasinnaavoq siunertanut allanut atugassatut. Taamaasilluni aallakaatitaq imaqarsinnaavoq atuakkamit atuaanermik, soorluttaaq taallat, tusarnaagassiat ilaalu ilanngullugit aallakaatitsinermi toqqammaviusinnaapput eqqumiitsuliornerup iluani.

Siunnersuummi § 17, imm. 1-ip taaneqartuni tamani malitsigaa, allaaserinnittoq akisussaammat imarisaanut, nalinginnaasumik malittarisassat naapertorlugit, tak. siunnersuummi § 10, imm. 1, tassungalu oqaasertat, allatap aallakaatinneqarnissaanut allaaserinnittoq akuersisimappat. Tamannali atuutinngilaq, allaaserinnittoq neriorsorneqarsimappat kinaassusaa saqqummiunneqassanngitsoq. Aaliangersagaq sunniuteqarnerpaassaaq allakkianut radiukkut tv-kkullu aallakaatitani atuarneqartussatut allatani. Tamakkunani aaliangersakkap malitsigissavaa, allatap allaaserinnittua inatsisitigut inissisimassammat, naafferartumik atuagassiat saqqummersartuni ilanngussamut allaaserinnittuulli, tak. pingaartumik § 10. Atuakkiat, taalliat, tusarnaagassiat, ilinniarsimanermut ilisimatusarnermulluunniit tunngasunik imallit ilaalu ilanngullugit nalinginnaasumik immikkooruteqassapput, taamaalillutik minnerusumik annerusumilluunniit radiukkut imaluunniit tv-kkut aallakaatitamut attuumassuteqaratik. Atuakkamut unioqqutitsisumik imalimmut atuakkiortoq imarisaanut nalinginnaasumik akisussaatinneqarsinnaavoq, radiukkut tv-kkulluunniit aallakaatinneqarnera apeqqutaatinnagu. Radiukkut imaluunniit tv-kkut aallakaatitsinikkut atuagaq innarligaasumit imaluunniit pisortanit eqqumaffigineqalernerata namminerisamik malitsiginaviannigilaa, tusagassiorneq pillugu akisussaaffitsigut malittarisassat imarisaata ataaniilernissaa. Kisianni atuagaq ilisimaneqarpiarsimanani radiukkut tv-kkulluunniit aallakaatitsinerup kingunerisaanik, atuakkap imarisaa unioqqutitsinertalik annertuumik innarliinerulersippagu, atuakkiortoq akisussaatinneqarsinnaavoq § 17, imm. 1-imi pisut taaneqartut iluini.

Qulaani taaneqartutuut allataq saqqummiunneqarsinnaavoq tv-kkut atuarneqarsinnaasunngorlugu. Assersuutigalugu nutsikkani aammalu tusilartunut naatsersuussamik allagartani, tv-kkut allagartat aammalu allatamut aaliangersimasumut qanillisitsinerit atuarneqarsinnaasunngortitsisut. Allatani tamakkunani akisussaasoq nalinginnaasumik aaliangiunneqartassaaq siunnersuummi § 17, imm. 1 naapertorlugu.

§ 17, imm. 1-imi allatat pillugit aaliangersaaneq, taputartuunneqassaaq § 20, imm. 2-mut, tassani pineqarlutik tamanut ammasumik ataatsimiinnernik imaluunniit pisunik allatigut soqutiginaatillinnik toqqaannartumik aallakaatitani akisussaasunik erseqqissaaneq. Aallakaatitani tamakkunani pinerluttaalisitsinermi inatsisitigut akisussaatisoqarsinnaavoq inatsimmi malittarisassat nalinginnaasut naapertorlugit. Pingaartumik tamanna isumaqarpoq, kinaassutsimik saqqummiinnginneq akisussaataanninnissamut tunngaviusinnaanngitsoq aammalu pinerluttaalisitsinermi malittarisassat peqataanermut tunngasut atuummata.

Imm. 2-mut

Radiumik tv-millu ingerlatsivik allatamik allaaserinnittumut kinaassutsimik saqqummiinnnginnissamik isumaqateqarsimatillugu, allatap imarisaanut aqqissuisoq akisussaassaaq, unioqutitsineq piaarinertut imaluunniit eqqumannngippallaarnermik taallugu aqqissuisumut tutsinneqarsinnaanngikkaluarpaluunniit, tak. siunnersuummi § 17, imm. 2. Aqqissuisulli toqqaannartumik akisussaanaera atuutinngilaq, qulaani taaneqartutuut, tamanut ammasumik ataatsimiinnernit ilaalu ilannngullugit toqqaannartumik aallakaatitsinerni, tak. siunnersuummi § 20, imm. 2.

Takuneqarsinnaasutuut siunnersuutigineqarpoq, imm. 1-imi aamma imm. 2-mi akisussaaneq pillugu malittarisassat allatat imarisaannut atorineqassasut, apeqqutaatinnagu allatat toqqaannartumik imaluunniit toqqaannanngitsumik aallakaatinneqarnersut. Allatat toqqaannanngitsumik aallakaatinneqartut pillugit imm. 3-mi siunnersuutigineqarpoq, aqqissuisoq aamma allatap imarisaanut akisussaasoq, allaaserinnittoq akuersisimanngippat allatap aallakaatinneqarnissaanut, imaluunniit atuagassiat naqitat pillugit malittarisassat naapertorlugit, tak. § 11, imm. 2, allaaserinnittoq akisussaatinneqarsinnaatinnagu Kalaallit Nunaannut attuumassuteqannginnera imaluunniit tarnikkut atukkat peqqutigalugit naatsorsuutigiuminaannera pillugit.

Kiisalu siunnersuummi § 17, imm. 3-mi siunnersuutigineqarpoq, aqqissuisup akisussaanaera taperlugu aaliangersaasoqassasoq, allaaserinnittup aqqata piunnginnera imaluunniit salloqittaanaera peqqutigalugit allataq ateqanngitsillugu, aqqissuisoq akisussaatinneqassasoq.

### *§ 18-imut*

Aaliangersakkap sammivaa oqaaseqaatit toqqaannanngitsumik aallakaatinneqartut imarisaanut akisussaaneq.

Siunnersuummi §§ 18-imiit 20-mut oqaaseqaateqartoq ima paasineqassaaq, inuk namminerisaminik saqqummiussisoq. Taamaammat inuk allap allagaanik atuaaginnartoq, allatulluunniit allap allagaanik oqaaserisimasaanilluunniit ingerlatitseqqiisooq, oqaasertaliussani pineqanngillaq, tak. aamma siunnersuummi § 22, taanna malillugu allap allagaanik oqaaseqaataanilluunniit ingerlatitseqqiisooq, allatap oqaaseqaatilluunniip imarisaanut akisussaannngilaq

Aammattaaq takorloorneqarsinnaavoq, oqaaseqaat ataaseq inuit ataatsikkut arlaqarlutik saqqummiukkaat. Imaassinnaavoq, apeqqarissaarnermi aallarniutitut tusagassiorloq akisussaaffilikkamik oqaaseqaateqartoq, apeqqarissaarfigineqartullu issuarpagu immaqalu itisilerlugu, taava tusagassiorloq apeqqarissaarfigineqartorlu oqaaseqaammik saqqummiussisimapput, taamalu oqaaseqaatip imarisaanut marluullutik akisussaatinneqarsinnaallutik.

### Imm. 1-imut

Siunnersuummi § 18, imm. 1-imi siunnersuutigineqarpoq, toqqaannanngitsumik oqaaseqaammik saqqummiussisoq, inatsisit nalinginnaasut maleruagassartaat

naapertorlugit, tak. § 10, imm. 1-imut oqaasertat, oqaaseqaatip imarisaanut akisussaassasoq. Pineqartorli akisussaangilaq, aallakaatitsinermi kinaassusaa saqqummiunneqanngippat, imaluunniit pineqartoq akuersisimanngippat oqaaseqaatip aallakaatinneqarnissaanut. Taamatut pisuni oqaaseqaat naleqqersuunneqarpoq, atuagassiani naafferartumik saqqummersartuni allakkiatut atertaqartinneqanngitsutut, tak. § 10, imm. 2. Radiukkut tv-kkullu allakaatitat immikkuullarittuunerisa akisussaataaangissinnaanermut periarfissat pingatsernissaat pisariaqalersippaa, atuagassiani naafferartumik saqqummersartuni pisariaqartinneqanngitsumik. Takorloorneqarsinnaavoq inuk radiukkut tv-kkullu oqaaseqaammik saqqummiinissaminut periarfissinneqartoq, aallakaatitakkut kinaassutsimi saqqummiunneqarnissaa pillugu sunniteqanngitsaq. Taamaammatt immaq inuk taanna oqaaseqaammik saqqummiivoq, naatsorsuutigalugu aallakaatitakkut kinaassutsi saqqummiunneqassanngitsaq, taamalu oqaaseqaatini atertaqartinneqanngitsutut pinerluttaalisitsinikkut inatsit naapertorlugu akisussaatinneqarnermik nassataqarsinnaanngitsaq. Kisianni radiukkut tv-kkullu aallakaatitsinermi kinaassutsimik isertuussisinnaaneq, atuagassianut naafferartumik saqqummersartunut sanilliullugu allaavoq. Allakkiaq kinaassuseqassanngilaq, allaaserinnittup atia ilanngunneqarsimanngippat. Kisianni radiukkut imaluunniit tv-kkut oqaaseqaat imaangilaq kinaassuseqanngitsaq, oqaaseqartup aqqata taaneqannginnera piinnarlugu. Pineqartoq kinaassusersineqarsinnaavoq, nipaa aqqutigalugu, imaluunniit inuup kiinaata timaataluunniit takutippassuk, kina oqaaseqaateqarnerisooq. Taamaattumik siunnersuutigineqarpoq, aallakaatitakkut toqqaannanngitsukkut oqaaseqaateqartoq, oqaaseqaatip imarisaanut akisussaassanngitsaq, pineqartoq neriorsorneqarsimappat kinaassusersineqarsinnaassanngitsaq aammalu tamanna anguniarlugu naapertuuttumik iliuuseqartoqarsimappat. Piumasaqaatit taakku eqqortinneqarpata, siunnersuutigineqarpoq pineqartoq kinaassusersineqaralaruniluunniit oqaaseqaammut akisussaatinneqassanngitsaq.

Peqataasup kinaassusersineqannginnissaa anguniarlugu iliuutsit suusinnaaneranngit apeqqutaassapput pisorpiaat. Radiukkut aallakaatitsinermi inuup nipaa ilisarnarunnaarsarneqarsinnaavoq. Tv-kkut aallakaatitsinermi inuk tunuaniit assileneqarsinnaavoq imaluunniit ilusaa kisiat saqqumitillugu, nipaa ilisarnarunnaarsaatigalugu allallu ilisarnarunnaarsaanerit atorlugit. Tunngaviummik imaassorinarpoq, peqataasooq ilisimaneqarnerujartortillugu, kinaassusersineqannginnissaa anguniarlugu iliuutsit annertunerujartussasut, akisussaatinneqanngissinnaanissaq anguneqassappat.

Oqaaseqaammik saqqummiussisumut akisussaataitsisinnaanermut oqaatigineqareersutut piumasaqaataavoq, oqaaseqaateqartup oqaaseqaatip aallakaatinneqarnissaa akuersisimassagaa. Taamannattaq piumasaqaataavoq, atuagassiakkut naafferartumik saqqummersartukkut aqqa taallugu allaaserisamik saqqummiussisup akisussaatinneqarsinnaaneranut. Allanisuulli akuersinernut immikkut ittunik piumasaqaatitaqanngitsunut akuersinertut paasineqassaaq, soorlu allaganngorlugu pinissaa piumasaqaataanani. Nipeqanngitsumik akuersineq taamaalilluni naammassinnaavoq.

Imm. 2-mut



Oqaaseqaatip imarisaanut akisussaannermik tutsitsinissamut piumasagaatit naammassineqanngippata, siunnersuummi § 18, imm. 2 naapertorlugu, oqaaseqaatip imarisaanut aaqqissuisoq akisussaasuvoq, unioqqutitsineq piaarinertut eqqumannngippallaarnertulluunniit aaqqissuisumut tutsitsinneqarsinnaanngikkaluarpaluunniit.

Toqqaannangitsumik aallakaatitakkut oqaaseqaatip atertaqartinneqartup imarisaanut taamatuttaaq aaqqissuisoq akisussaavoq, kinaassuseq pillugu eqqunngitsunik paasissutissiisoqarpat, Kalaallit Nunaannut attuumassuteqannginneq imaluunniit tarnikkut naatsorsuutigineqarsinnaannginneq peqquutigalugit, oqaaseqaammik tunniussisoq akisussaatinneqarsinnaanngippat.

#### *§ 19-imut*

Aaliangersakkap sammivaa tusagassiuutit allat aqquutigalugit allatap oqaaseqaatilluunniip atilerlugu saqqummiunneqarsimasup imarisaanut akisussaaneq. Nutaarsiassaqaartitsivimmiit telegrammimik atuaanerusinnaavoq, imaluunniit aviisini allatatut ilanngussaasinnaavoq, imaluunniit allatamik saqqummersinneqarsimasumik ingerlatitseqqiinerusinnaalluni, imaluunniit oqaaseqaat radiuumik tv-milluunniit ingerlatsivinniit aallakatitakkut saqqummiunneqarsimasinnaalluni.

Malittarisassami pkt. 1-imiit 3-mut pineqartut assigaat, § 12-imi atuagassiat naafferartumik saqqummersartut pillugit aaliangersakkat; aaliangersagaq tassungalu atasumik oqaasertat innersuussutigineqassapput.

Pkt. 4-mi aaliangersarneqarpoq, allataq saqqummiunneqartoq nutaarsiassaqaartitsivik ataaseq kisiat paasissutissiisoralugu, atertaqartinneqanngitsutut isigineqassammat, tak. § 10, imm. 5, tassungalu oqaasertat.

#### *§ 20-mut*

Toqqaannartumik aallakaatitani oqaaseqaatit saqqummiunneqartut malittarisassap sammivai. Oqaaseqaat saqqummiunneqarsimasinnaavoq radiuumik tv-millu ingerlatsivimmiit aaqqissukkamik apeqqarissaarnermi imaluunniit oqallitsitsinermi imaluunniit assigisaanik ittuni, tak. imm. 1, imaluunniit naalakkersuineq pillugu ataatsimiinnerup nalaani oqaaseqaataasinnaavoq, naalagiarnermi imaluunniit aaqqissuinermi allami, toqqaannartumik aallakaatinneqartumi, tak. imm. 2.

Iliuuseq pissusilersuut, isikkulersuut assigisaanilluunniit iliuuseq, isummamik saqqummersi-tsinerusinnaavoq, tak. assersuutitut pinerluttaalisitsinermi inatsisip aaliangersagai suusupaginninniarluni "ajuallatsitsiniutitut iliuutsit" pillugit, taakkua "oqaaseqaatip" suussusilernerata iluaniipput.

Oqaaseq "oqaaseqaammik saqqummiisoq" § 18 pillugu oqaasertani taaneqarpoq, taakkulu innersuussutigineqassapput.

### Imm. 1-imut

Aaliangersakkami imm. 1-imi erseqqissarneqarpoq, toqqaannartumik aallakaatitsinermi oqaaseqaammik saqqummiussisoq, inatsisip nalinginnaasumik malittarisassai naapertorlugit akisussaasuusoq. Aamma takukkit § 10, imm. 1-imut oqaasertat, malittarisassat nalinginnaasut naapertorlugit akisussaannermut tunngasut. Toqqaannartumik aallakaatitami oqaaseqaammik saqqummiisoq akisussaannngilaq, pineqartoq neriorsorneqarsimappat peqataanermigut kinaassusersineqarsinnaassannngitsoq, tamannalu anguniarlugu naapertuuttunik iliuuseqartoqarsimappat. Kingullermi pisumi, oqaaseqaatip imarisaanut aaqqissuisoq akisussaasuvoq, piarineq imaluunniit eqqumanngippallaarneq tunngavigalugit, unioqqutitsinermit akisussaatisoqarsinnaannngikkaluarpalluunniit.

Kinaassusersineqannnginnissamik siunertaqarluni iliuuserineqarsinnaasut pillugit, erseqqinnerusumik § 18-imut oqaasertani taaneqartut innersuussutigineqarput.

Imm. 1, pkt. 3 naapertorlugu, toqqaannartumik aallakaatitsinermi oqaaseqaatip imarisaanut aaqqissuisoq tamakkua saniatigut akisussaasuvoq, oqaaseqaammik tunniussisoq akisussaatinneqarsinnaanngippat, taanna kinaassutsi pillugu eqqunngitsumik paasissutissiisimappat, Kalaallit Nunaannut attuumassuteqanngippat imaluunniit tarnikkut atugai pillugit naatsorsuutigineqarsinnaanngippat.

### Imm. 2-mut

Imm. 2-mi aaliangersakkap sammivaa radiukkut tv-kkullu toqqaannartumik tamanut ammasumik ataatsimiisitsinermit allalluunniit pisut soqutiginaatillit aallakaatinnerini allatanut oqaaseqaatinullu akisussaaneq. Aaliangersagaq pingaartumik tunngaveqarpoq radiumik tv-millu ingerlatsiviit aaqqissuisua sulisuilu nalinginnaasumik sunnuteqarsinnaaneq ajormata, aallakaatitani taama ittuni allatat oqaaseqaatillu imarisaannut. Aammalu akuttunngitsumik ilisimaneq ajorpaat, aallakaatitami kikkut "takutitsilernersut". Tamanna peqqutigalugu, aallakaatitassioriaatsinillu taama ittunik atornerluisoqarsinnaanera pakkersimaarniarlugu siunnersuutigineqarpoq, aallakaatitani taama ittuni, pinerluttaalisitsinermi inatsisip akisussaaneq pillugu malittarisassai, ilaatigut peqataanermut malittarisassat nalinginnaasut, atuutsinneqassasut

### *§ 21-mut*

### Imm. 1-imut

Imm. 1-imi aaliangersakkap erseqqissarpai, § 17, imm. 1-imi, § 18, imm. 1-imi aammalu § 20, imm. 1-imi taaneqartut naapertorlugit, allatap imaluunniit oqaaseqaatip imarisaanut aaqqissuisup sutigut akisussaanera. Aaliangersakkap assigai, § 13, imm. 1-imi atuagassiat naafferartumik saqqummersartut pillugit aaliangersakkat. Taamaattoq radiukkut tv-kkullu aallakatitat immikkut ittuuneri peqqutigalugit, toqqaannartumik aallakaatitsinermit akisussaaqataanermut

piumasaqaatit taperneqarput imaasillugu, aaqqissuisup ilisimassagaa allataq saqqummiunneqassasoq, imaluunniit oqaaseqaat suaarutigineqassasoq.

### Imm. 2-mut

Imm. 2-mi aaliangersakkap siunertaraa qulakkiissallugu, ilumut oqaaseqaateqartup, kinaassusaatalu isertuunneqarnissaanik neriorsorneqarsimasup kisimi akisussaaffigissanngikkaa, radiumik tv-millu ingerlatsiviup naapertuuttumik kinaassutsip isertuunnissaanut iliuseqarsimanissaa. Imm. 2-mi pisuni taama ittuni siunnersuutigineqarpoq, aaqqissuisup akisussaaqataatinneqarnissaa toqqaannartumik takussutissat toqqammavigalugit, aallakaatitat toqqaannartut toqqaannanngitsullu eqqarsaatigalugit.

### *§ 22-mut*

Aaliangersakkap pivaa, ingerlatitseqqiisarneq, soorlu allatanik aamma oqaaseqaatinik atuaanertut ilusilik. Tamanna peqquteqarpoq radiukkut tv-kkullu aallakaatitat atuagassianit naafferartumik saqqummersartunit allaanerulluinnarnerannik. Aallakaatitsinerni amerlasuuni aqqusaagassat marluukkajupput, tassa allaaserinnittoqarpoq atuaasoqarlunilu allatulluunniit ingerlatitseqqiisoqarluni, tusagassiortup allagaa oqaluttup nalunaarutitut atuassavaa, isiginnaartitsisartup taallaq, atuakkiaaraq atuakkjarluunniit allap allagaa atuassavaa, soorlu erinarsortartup erinarsuummik allat oqaasiinik tunngaveqartumik atuisartoq, imaluunniit radiukkut "isiginnaartitsisarfik" imaluunniit tv-kkut isiginnaartitsisarfik isiginnaagassiortup suliaanik saqqummiisartoq. Radiukkut tv-kkullu aallakaatitat immikkoorutigaa, amerlasuutigut oqaaseqaatit saqqummiunneqartarmata oqaloqatigiinnerup imaluunniit oqallinnerup nalaani. Siulleq pisoq eqqarsaatigalugu taaneqarsinnaapput tusagassiortup qinikkamik, ilisimatuumik, atorfilimmik, piorsarsimassutsikkut saqqumilaartumik allanilluunniit oqaloqatiginninnera, oqallinnerli kikkut tamarmik oqaaseqarfigisinnaassaattut ilisarnaatitaqarluni, oqaaseqartarnerit isummersornerillu assigiinngitsut amerlasuujusinnaallutik. Akisussaaneq pillugu malittarisassat § 16-imiit 21-mut siunnersuutigineqartut malitsigaat, allatat atuarneqartut allatulluunniit ingerlateqqinneqartut allaaserinnittumit imaluunniit aaqqissuisumit akisussaaffigineqarmata, apeqqarissaarnermilu imaluunniit oqallinnermi oqaaseqaatit saqqummiunneqartut, annitsisumiit imaluunniit aaqqissuisumit akisussaaffigineqarlutik. § 22-imi siunnersuutigineqarpoq, ingerlatitseqqiisoq atuaasuuguni, oqaluttuuguni, erinarsortartuuguni, isiginnaartitsisartuuguni, tusagassiortoq apeqqarissaartuuguni, oqallinnermik aqutsisuuguni taamaaqataaluunniit, allatap imaluunniit oqaaseqaatip imarisaanut akisussaannngitsoq. Akisussaataaannngissinnaanerli atuutinngilaq, ingerlatitseqqiisoq namminerisaminik oqaaseqaammik pinerluttaalisitsinermi malittarisassat naapertorlugit akisussaaffitalimmik imalimmik anitaqaruni. Tassani aaliangersakkat §§ 18-imi aamma 20-miittut naapertorlugit apeqqutaavoq, ingerlatitseqqiisoq imaluunniit aaqqissuisoq oqaaseqaatip imarisaanut akisussaaneq. Killuinikkut allatulluunniit allannguinnikkut oqaaseqaatip imarisaa allanngorpat, akisussaataatitsinermut apeqqutaassaaq, allannguutit oqaaseqaatip imarisaanik akisussaaffitalikkanik allannguinersut. Tamatuminnga

allannguisoqanngippat, oqaaseqaammik annitsisoq imarisaanut akisussaassaaq. Allannguutit peqqutigalugit oqaaseqaat akisussaaffittalinnik imaqalerpat, inuk imaluunniit inuit allannguisut taakkuupput, pissusiviusut naapertorlugit oqaaseqaammik akisussaaffittalikkamik annitsisuusut, pisorlu taama ittoq taamaasilluni §§ 18-imi aamma 20-mi akisussaaffik pillugu aaliangersakkat naapertorlugit naliliivigineqassaaq. Pisoq sanillersuunneqarsinnaavortaaq, atuagassiaq naafferartumik saqqummersartooq allatamik atilimmik saqqummiussippat, aaqqissuisut allattaata allanngortitaanik, taamalu inatsisit unioqqutillugit imaqalersillugu, imaluunniit allakkiaq atilik unioqqutitsinngitsumik imalik unioqqutitsisumik qulequtserneqarpat. Tassunga atasumik § 11-mut oqaasertat innersuussutigineqassapput.

Tassunga atasumik oqaatigisariaqassaaq, KNR aammalu radiukkut tv-kkullu ingerlatsinissamut akuersissummik pigisaqartoq, radiumik tv-millu ingerlatsineq pillugu peqqussummi atuuttumi § 16 naapertorlugu, pisussaammat sillimaniarnermi innuttaasunut pingaarutilinnik aallakaatitsinissaminut, Naalakkersuisut maleruqaqusiaat naapertorlugit. KNR aammalu aallakaatitsinissamut akuersissummik piginnittoq, nalunaarutit sillimaniarnermut pingaarutillit imarisaannut akisussaatinneqarsinnaanngillat. Radiukkut tv-kkullu ingerlatsiviit pineqartut taama pisuni isigineqassapput ingerlatitseqqiisutut, tamatumalu malitsigaa - § 22-mi aaliangersagaq malillugu - akisussaatinneqarsinnaannginnerat. Akisussaataannginnerli atuutinngilaq, ingerlatsivik pineqartoq namminerisaminik imarisamigut akisussaaffittalimmik nalunaaruteqarpat.

#### *§ 23-mut*

Aaliangersakkap assigaa § 15, allaassutigiinnarlugu, naqiterisitsisumut taarsiullugu radiumik tv-millu ingerlatsivik pineqarmat.

#### *§ 24-mut*

Aaliangersakkap sammivai tusagassiuutit siunnersuummi § 1, nr. 3-mi taaneqartut. § 1, nr. 3-mut oqaasertani erseqqissarneqarpoq, tusagassiuutit pineqartut piumasaqaatit suut naammassisimassagaat tusagassiiveqarnerup iluani akisussaaffitsigut aaliangersakkat ataani inissisimassagunik. Ilaat nunap iluani atuagassianut naafferartumik saqqummersartunut pingaarutilimmik assigiissuteqarmata, allallu radiukkut tv-kkullu aallakaatitanut assingunerullutik, § 24-kkut siunnersuutigineqarpoq, tusagassiuutit imarisaannut akisussaaneq aaliangersarneqassasoq malittarisassat §§ 9-miit 15-imut imaluunniit §§ 16-imiit 23-mut allaqqasut naapertorlugit, tusagassiuutip qanoq ittuunera apeqqutaatillugu.

#### *§ 25-mut*

Siunnersuutigineqarpoq inatsisit nalinginnaasut iluini akisussaanermut malittarisassat atorneqassasut, unioqqutitsinerit sakkortunerit aaliangersakkami

taaneqartut eqqarsaatigalugit. Taaneqartut tassaapput pinerluttaalisitsinermi inatsimmi § 11 nunamut killuussineq pillugu, § 12 isertortumik paasiniaanerit, § 13, imm. 1 nunamut akornutaasumik ingerlatsinerit, § 14, imm. 1 eqqissiviillortitsinerit, § 15, imm. 1 qinersinermik innarliinerit, § 34 aningaasaasaliorluni peqquserlunnerit, § 37 meqqinik peqquserlunnerit, § 39 ikuallatsitsinerit, § 40 ingerlatsinerit akornusiinerit, § 40a silaannakkut angallatinik tiguaanerit, § 41 pinngitsaaliinerit, § 53 suaassutsikkut meeqqanik atoqateqarneq, § 57, imm. 1 toqutsineq, § 61 inuup inuuneranik sumiginnaaneq aammalu § 64 illersorneqarsinnaanngitsumik navianartunik suliaqarneq.

Aaliangersagaq isumaqarportaaq, allaaserinnittup aqqissuisullu saniatigut allat akisussaatinneqarsinnaammata. Saniatigut ataatsikkut inuit arlaqartut akisussaatinneqarsinnaapput, pinerluttaalisitsinermi inatsisip iluani peqataaneq pillugu nalinginnaasumik malittarisassai atorneqassammata, taamalu kinaassutsimik isertuineq akisussaatisisoqannginneranik kinguneqassannani.

Aaliangersagaq isumaqarportaaq, unioqquitsinerit sakkortunerit ilaat pinerluttaalisitsinermi inatsisip aaliangersagai naapertorlugit nalilerneqassammata, naak unioqquitsinerit tusagassiuutit imarisaat aqquutigalugit pigaluartut.

Malittarisassatut siunnersuutigineqartup sammivai tigussaasumik tusagassiornermi unioqquitsinerit, tunngaviusumik tusagassiteqarnerup iluani akisussaaffiit pillugit malittarisassat ataanniikkaluartut, unioqquitsinerulli sakkortussusaa peqquutigalugu nalinginnaasumik inatsisip ataanniitineqartut akisussaatisisinnaaneq anguniarlugu. Inatsisilerinerup iluani "tigussaasumik tusagassiornermi unioqquitsineq" nalinginnaasumik tassaavoq, atuagassiap naafferartumik saqqummersartup imarisaagut unioqquitsineq, atuagassiamik atuartartunut saqqummiunneqartoq imaluunniit atuartartunut amerlasuunut (amerlassusilerneqanngitsunut), unioqquitsinerlu takuneqarsinnaalluni atuagassiap atuarnertut. Taamaalilluni piumasaqaataavoq unioqquitsineq atuagassiaq aqquutigalugu oqaaseqarnikkut pissasoq. Taaguutip iluaniippat unioqquitsinerit aamma innarliinerit piliarineqartut, tusagassiuutitigut saqqummiinikkut. Kisianni tigussaasumik tusagassiornermi unioqquitsinerunngilaq unioqquitsineq pereersoq, kingusinnerusukku atuartartunut siammarterneqarpat, tamannalu unioqquitsinertut isigineqanngippat. Aammattaaq oqaatigineqassaaq, unioqquitsinerit qallikkut ilutsimut tunngasut, imaluunniit atuagassiaq piumasaqaatinik naammassinninngitsaq, soorlu naqiterneqarfianik erseqqissaasoqanngippat, tusagassiteqarnermi akisussaaffik pillugu malittarisassat ataani issanngimmata.

## § 26-mut

### Imm. 1-imut

Aaliangersakkap siunnersuutigaa tusagassiuutinut tamanut atuuttumik akisussaatisisinnaanermik maleruagassisoqassasoq, akiligassiinerit suliamullu aningaasartuutit inatsisissatut siunnersuutip matuma akisussaaneermik agguuasineq pillugu malittarisassaanut ilaasut tamaasa ilaatillugit. Aaliangersakkamut

tunngavigineqarput inuup eqqissisimatinneqarnissaata ataqqinassusaatalu illersornissaa aammalu inuiaqatigiit naammattumik inatsisitigut illersuinissamut pisussaaffeqarnerat.

#### Imm. 2-mut

Aaliangersakkami imm. 2-mi siunnersuutigineqarpoq, akiligassiinermi akisussaaffiup erseqqissarnerani pingaartinneqassasoq, unioqqutitsineq pisimanersoq immikkut sakkortuutut taaneqarsinnaalluni, aammalu innuttaasut nalinginnaasumik soqutigisaannik kiffartuussinerussanngitsoq, taamalu unioqqutitsinermi aningaasarsiornikkut iluanaaruteqarsimaneq imaluunniit iluanaaruteqarnissaq siunertarineqarsimaneq.

#### *§ 27-mut*

Aaliangersakkap erseqqissarpaa takoqqusaarutitut aamma pilerisaarutitut akisussaaneq, taamaalilluni taakkua tusagassiornermi akisussaaffiit pillugit immikkut aaliangersakkanit avissaartillugit, tassami mianerisassat allaammata takoqqusaarutit imarisaat eqqarsaatigalugit. Paasissutissiissutigineqarsinnaanngippat kina akiliilluni takoqqusaarummik ilanngussisimaneq, aqqissuisoq tigussaasumik tunngaveqartumik akisussaassaaq.

#### Imm. 1-imut

§ 27, imm. 1-imi erseqqissarneqarpoq, takoqqusaarummik ilanngussisoq, tassungalu ikiuuttoq, taakkuusut takoqqusaarutit imarisaanut inatsimmi nalinginnaasumik malittarisassat naapertorlugit akisussaasut, tamatuma ataaniillutittaaq akisussaatsineq peqataanerlu pillugit malittarisassat. Takoqqusaarut ilanngussisup aqqanik imaqarpat imaqanngippalluunniit. Aammattaaq tamanna atuuppoq, takoqqusaarut akeqanngippat, imaluunniit ilanngunnera akeqarpat. Takoqqusaarutit ilanngunnissaanut ikiuuttoq unaagajuppoq takoqqusaarutit imaluunniit pilerisaarutit ingerlatsivik.

#### Imm. 2-mut

Imm. 2 naapertorlugu, inatsisip nalinginnaasumik malittarisassai naapertorlugit takoqqusaarutit imarisaanut aqqissuisoq akisussaaqataavoq. Tassaniippoq tusagassiummut attuumassutillit allat, pinerluttaalisitsinermi inatsimmi peqataaneq pillugu malittarisassat naapertorlugit akisussaatinneqarsinnaanngitsut. Inatsisip nalinginnaasumik malittarisassai naapertorlugit aqqissuisup akisussaanerata malitsigaa, aqqissuisoq tigussaasumik tunngavilikkamik akisussaanngitsoq, soorlu aqqissuisutut ilanngussat ilaat eqqarsaatigalugit taama ittoq.

Tassunga atasunik oqaatigineqassaaq, siunnersuummi § 6 naapertorlugu kimulluunniit malittarisassat naapertorlugit soqutiginnissinnaasumut aqqissuisoq pisussaammat paasissutissiissalluni, takoqqusaarutit pineqartut kinaassusersineqarnissaannut, taamalu takoqqusaarummik ilanngussisup

kinaassusersineqarnissaanut. § 6 naapertorlugu aaqqissuisoq paasisutissisussaatitaanermik eqqortitsinngippat, taanna takoqqusaarutip imaanut akisussaassaaq, aaqqissuisoq unioqqutitsinermi piaarisutut eqqumangippallaartutulluunniit akisussaatinneqanngikkaluaruniluunniit.

#### *§ 28-mut*

Aaliangersakkap peqqussutigaa, Naalagaaffiup unnerluussisuunerata aaliangertassagaa, inatsisissatut siunnersuutip ataani ittuni tusagassiutip imarisai tunngavigalugit, pisortanit suliaassanngortitsisoqassanersoq. Tamatuma uparuaateqarnissamut oqartussaaffiup eqqartuussiveqarneq pillugu inatsimmi nalinginnaasumik uparuaateqarsinnaanermi malittarisassat assiginngilai, pingaartumillu siunertaralugu uparuaateqarnermik suleriaatsit assigiimmik ingerlanneqarnissaat. Tamannali ullumikkut aaliangersakkanik atuuttunik nangitseqqinneruvoq.

#### *§ 29-mut*

Aaliangersakkap erseqqissarpaa, nunap iluani atuagassiap naafferartumik saqqummersartup imarisaanut kina taarsiisussatut akisussaaanersoq.

Aaliangersakkap malitsigaa, nunap iluani atuagassiap naafferartumik saqqummersartup imarisaanut taarsiisussatut akisussaasut tassaasut, pinerluttaalisitsinermi inatsit naapertorlugu akisussaatinneqarsinnaasut, taamaasilluni akisussaatinneqarsinnaasut taakkuuinnaarlutik, taamalu akisussaatinneqarsinnaasup imaluunniit -sut kikkuneri pinerluttaalisitsinermi inatsit naapertorlugu akisussaatinneqarsinnaasut pillugit malittarisassat assigalugit pisassaaq. Aaliangersakkamiinngilaq pinerluttaalisitsineq naapertorlugu iliuutsit pineqaatissiissutaasinnaasut kisimik taarsiisussanngortitsissutigineqarsinnaasut. Atuagassiami naafferartumik saqqummersartumi allaaserisap assigisaatalluunniit taarsiisussanngortitsissutigineqarsinnaaneranik apeqqummut aaliangiisuvoq, kalaallit taarsiisussaatitaanermut aaliangersagaat nalinginnaasut naapertorlugit imarisamigut unioqqutitsiviunersoq.

Qulaani malittarisassat taaneqartut naapertorlugit taarsiinissamut akisussaaneq isumaqarpoq, akisussaaffik tamarmi aaqqissuisumut aammalu allaaserinnittumut tutsinneqassasoq, taamaasilluni soorlu naqiterisitsisoq sulisitsisutut tunngaviummik akisussaatinneqassanngitsoq, kisiannili aaqqissuisup taarseqqusaaneranut akiliisussanngortinneqarsinnaasooq.

#### *§ 30-mut*

Aaliangersagaq isumaqarpoq, atuagassiamut naafferartumik saqqummersitap imarisai pillugit aaqqissuisumit taarsiisutigeqqusanut aammalu suliamut aningaasartuutinut akiliisussanngortinneqartunut, naqiterisitsisoq

akiliisussanngortinneqassasoq, piviusunngortitsiniartoqarsinnaallunilu naqiterisitsisup akiliigallartinneqarneragut, aaqqissuisumut eqqartuussinikkut aaliangiineq tunngavigalugu. Tamanna atuuppoq, naak naqiterisitsisoq taarsiisussatut akisussaaneq pillugu eqqartuussinermi akulerutsinneqarsimangikkaluarpalluunniit. Taama naqiterisitsisumut akiliinissamik pisussaaffiliinerup aamma iluaniipput, allaaserinnittumit aammalu nalunaarutiginnissimasinnaasumit taarsiisoqarnissaanik suliamullu aningaasartuutit matussusernissaanik eqqartuussinikkut aaliangiinerit eqqarsaatigalugit, atuagassiami sulisuuneri sulisuunnginneriluunniit apequtaatinnagu. Aaliangersakkap erseqqissarpaa, naqiterisitsisoq toqqaannartumik akiliisussanngortinneqassasoq, tamannalu isumaqarpoq naqiterisitsisup pisussaaffilerneqarnera assigimmagu atorniartumut uppernarsaasutut inissisimanertut. Nalinginnaasumik aaliangersakkat tunngaviusut naapertorlugit, naqiterisitsisoq pisinnaavoq akiliutimi utertinnissaanut, inatsisissatut siunnersuummi § 29 naapertorlugu taarsiisussatut akisussaatinneqartumit.

#### *§ 31-mut*

Aaliangersakkap ingerlaqatigisutullusooq ippaa § 29 aammalu erseqqissarlugu, radiukkut tv-kkullu aallakaatitanut taarsiisussanngortinneqarsinnaasut taakkuusut, aallakaatitap imarisai pillugit pineqaatissinneqarsinnaasut. Akisussaatinneqarsinnaasut aammalu erseqqinnerusumik inummik inunnilluunniit taarsiisussanngortitsisinnaanermut piunasaqaatit taamaasillutik naapertuupput, siunnersuummi radiukkut tv-kkullu aallakaatitat tunngavigalugit pineqaatissiisinnaanermut aaliangersakkanut.

#### *§ 32-mut*

Aaliangersagaq isumaqarpoq, KNR imaluunniit ingerlatsiviit radiukkut tv-kkullu aallakaatitsinissaminut radiumik tv-millu ingerlatsineq pillugu Inatsisartut peqqussutaat naapertorlugu akuersissummik peqartut, tusagassiortup aqqatigut taasap, allaaserinnittup, assiliisup il. II. taarsiinissamik akisussaaffilerneqartup, akiligassaanut toqqaannartumik akisussaatinneqassasut.

#### Imm. 1-imut

Aaliangersakkami imm. 1-ip § 30-mi taarsiisussanngortitsineq pillugu malittarisassaq assingaa, oqaaserli naqiterisitsisoq taarserneqarluni KNR-mik aammalu ingerlatsiviit, radiumik tv-millu ingerlatsineq pillugu Inatsisartut peqqussutaat naapertorlugu akuersissummik peqartunik.

#### Imm. 2-mut

Aaliangersakkami imm. 2-mi taarsiisussaataitanermut akisussaaffik killilerneqarpoq, tamanut ammasumik ataatsimiinnernit allaniluunniit soqutiginaatilimmik pisunit toqqaannartumik aallakaatitsinerit eqqarsaatigalugit, tamannalu peqquteqarpoq, radiumik tv-millu ingerlatsiviup aallakaatitsinerit pineqartut tamakkiisumik



aqussinnaanngimmagit imarisamikkut qanoq ineriartussanersut, taamalu ingerlatsivik periarfissaqanngimmat imarisamikkut akisussaaffilikkat toqqaannartumik aallakaatitsinerni piiassallugit.

### § 33-mut

Aaliangersagaq siunnersuummi § 24-mut sanilliunneqassaaq, tamannalu malillugu pinerluttaalisitsinermi inatsit naapertorlugu tusagassiiuutit § 1, nr. 3-mi taaneqartut imarisaannut akisussaaneq §§ 9-miit 15-imut malittarisassat naapertorlugit imaluunniit §§ 16-imiit 23-mut taaneqartut naapertorlugit, inissinneqassaaq, tusagassiuutip qanoq ittuunera apeqqutaatillugu. § 33-p nassatarivaa tusagassiiuutit pineqartut imarisaat aammalu siammarterneri tunngavigalugit taarsiinissamut akisussaaneq tutsinneqarmat, malittarisassat taakkorpiaat naapertorlugit.

### § 34-mut

#### Imm. 1-imut

Siunnersuummi § 34, imm. 1 imaqarpoq piumasaqaammik ataatsimoorussamik, taannalu malillugu tusagassiiuutit imarisaat iliuusaallu tusagassiornermi pissuserissaarnermut naapertuuttuussaaq. Aaliangersakkap sammivai inatsisissatut siunnersuummi § 1, nr. 1-imiit 3-mi tusagassiiuutit taaneqartut.

Inatsisit nutaanerusut allatigut atuuttut naapertorlugit, ataatsimoorussamik piumasaqaat taamaattoq anguniagassaannaanngilaq, aammali tigussaasutigut malittarisassaalluni, inatsisiliornikkut ineriartortitsinermut tunngavissatut naapertuuttoq. Piumasaqaat isigineqassaaq inatsisitigut najoqqutassatut, pisut assigiinngitsut ataatsimut eqikkarlugit tamanut atuuttumik malittarisassiornermut immikkut ilisarnaateqartutut, malittarisassanik immikkut iittuunerusunik tapertaasinnaasoq aaqqiissutaasinnaasorlu imaluunniit kisimi inissisimasinnaasoq.

Najoqqutassap taassuma – ersarinnerusumik "tusagassiornermi pissuserissaarner"-mik suussusiliinngitsup – inissisimanera isumaqarpoq Tusagassiiuutit pillugit Aaliangiisartut – naammagittaalliortarfittut pissuserissaarnissamik malittarisassanik eqquutitsinermik atuutitsisussatut – maleruartaqqat sinaakkusiussaasa iluanni missingissagaat, pisuni aaliangersimasuni tusagassiuinermi ileqqorissaarnissamik maliitarsassat unioqqutillugit tamanut saqqummiisoqarsimanersoq. Aammattaq sinakkusiussat taakkua iluanni missingiineq pituttorneqanngilluinnartuussanngilaq, tassami ilitsersuutaasumik pissuserissaarnissamik malittarisassat tassaassapput "tusagassiornermi ileqqorissaarnerup" imarisassaanut ersarinnerusunut tunngaviusussat. Matuma kingorna naammagittaalliortarfiup suleriaasia, tunngavissat nalinginnaasut – tamanut piumasaqaatit "tusagassiornermi ileqqorissaarnerup" pillugu maleruartaqaliamut tunngaviusut - imassaannik annertusaarnermut erseqqissaanermullu pingaaruteqartumik tapertaassaaq. Oqaasertanut ilanngussatut tusagassiornermi ileqqorissaarnissaq pillugu malittarisassat ilitsersuutaasut issuarneqarput.

Tusagassiornermi ileqqorissaarnerup pitsaassusaanik aaliangersaarerup oqaasertalenera aammattaaq tusagassiuutit imarisaannut pissusilersuutaannullu attuumassuteqarpoq. Tassani ippoq, ataatsimut naliliineq tunngavigalugu tusagassiuutit pissusilersorsimassasut tusagassiornermi ileqqorissaarnermut naapertuuttumik. Oqaatsimi "imarisaq"-mi taamaasilluni pineqaannangilaq imarisaasoq imaluunniit oqaaseqatigiit imaluunniit assilisap "piviusumik" oqariartuutaa, aammali pineqarlutik imarisaata qanoq saqqummiunneqarnera, saqqummiussinerullu ilusaa. Allaaserisap imaluunniit taassuma qulequtaata saqqummiunneqarnera, saniatigut allatat imarisaata sinneranut imaluunniit assilisat imarisaat tusagassiornermi ileqqorissaarnermut naapertuutissapput. Oqaatsip "pissusilersuutit" pingaartumik sammivaa, tusagassiornerup iluani paasissutissanik piniarnermi periuserineqarsimasut, oqaatsilli "imarisaq"-mut taputartuunneragut, qulaani oqaatigineqartut naapertorlugit pineqarput, saqqummiussinermi pissusilersuutit ataatsimut isigalugit qanoq ittueneri. Maluginiarneqassaaq, imarisaq aammalu iliuuseq, maleruagassani qitiusumik inissisimmamata, aammali attuumassutilinni allani maleruagassat atorneqarsinnaallutik.

#### Imm. 2-mut

Imm. 2-mi aaliangersakkap malitsigaa, tamanut aaliangersakkat nunap iluani atuagassiamit naafferartumik saqqummersartumit, radiumik tv-millu ingerlatsivimmit imaluunniit § 1. nr. 3-mi tusagassiuutinit taaneqartunit unioqqutinneqarnerat pillugu naammagittaalliuutit, tusagassiuummut pineqartumut saaffiginissutigineqarsinnaasut, imaluunniit Tusagassiuutit pillugit Aaliangiisartunut toqqaannartumik tunniunneqarsinnaasut, taamaattorli tak imm. 3. Tusagassiuummut naammagittaalliut tassunga tunniunneqarsimassaaq, kingusinnerpaamik saqqummiussinermit sap. akunneri sisamat qaangiutsinnagit. Tusagassiuutip naammagittaalliut pillugu aaliangerneru Tusagassiuutit pillugit Aaliangiisartunut tunniunneqarsinnaavoq, aaliangernerup naammagittaalliortumit tiguneqarneraniit kingusinnerpaamik sap. akunneri sisamat qaangiutsinnagit. Naammagittaalliortoq toqqaannartumik Tusagassiuutit pillugit Aaliangiisartunut naammagittaalliorniarpat, saqqummiussineq sap. akunneri sisamat periarfissarineqassapput.

#### Imm. 3-mut

Tamanut aaliangersakkat KNR-imit unioqqutinneqarsimaneri pillugu naammagittaalliuutit eqqarsaatigalugit, imm. 3-mi erseqqissarneqarpoq, naammagittaalliuutit taama ittut siullermik KNR-imut tunniunneqassasut, tamannalu pissasoq saqqummiussinermit sap. akunneri sisamat qaangiutsinnagit. Naammagittaalliut pillugu KNR-ip aaliangiinerata kinguneratigut, aaliangiinerup tighuneraniit sap. akunneri sisamat qaangiutsinnagit Tusagassiuutit pillugit Aaliangiisartunut naammagittaalliutigineqassaaq. Tassunga peqqutaavoq, maleruagassat atuuttut naapertorlugit KNR pisussaaffeqarmat naammagittaalliuutit apuunneqartut suliarissallugit, taamalu KNR pisortat ingerlatsivigimmassuk. Naatsorsuutigineqarsinnaavoq naammagittaalliornissamik periarfissatut siunnersuutip qulakkiissagaa, naammagittaalliortut naammaginartumik

sullinneqarsinnaanissaat, taamalu suliat Tusagassiuutit pillugit Aaliangiisartunut naammagittaalliutitut apuussat amerlassusaat killilersimaarneqarsinnaalluni.

### *§ 35-mut*

Aaliangersakkap erseqqissarpaa, radiukkut tv-kkullu pilerisaarutit pillugit ileqqorissaarnissamik malittarisassat ingerlaqqittumik isumagineqassasut Radio tv-lu pillugit suleqatigiissitami, radiumik tv-millu ingerlatsineq pillugu Inatsisartut peqqussutaat atuuttoq naapertorlugu, kiisalu radiukkut tv-kkullu pilerisaarutit aamma aningaasalersuineq pillugit Namminersornerullutik Oqartussat nalunaarutaat naapertorlugu.

### *§ 36-mut*

Aaliangersakkap pivaa, naammagittaalliortup akerliliisinnaanermut periarfissaa, paasineqassalluni naammagittaalliortup tusagassiuutit aqutigalugit suliaq pillugu isummaminik oqarsinnaanissaatut. Tassa tusagassiummut peqqusinerunngilaq, akerliliineq namminneq ilusilissagaat, tassami piumasaqaataavoq, nalinginnaasumik akerliliineq naammagittaalliortumit nammineq ilusilerneqassasoq, tassani pineqarmat paasissutissat saqqummiunneqartut pillugit naammagittaalliortup naqqiuteqarnissaminut periarfissaa.

### Imm. 1-imut

Siunnersuummi imm. 1 isumaqarpoq, akerliliisinnaatitaaneq taamaallaat pisinnaasoq, tusagassiuutikkut saqqummiussat paasissutissaappata tigussaasut aningaasaqarnikkut allatulluunniit pingaarutilimmik ajoqusiinnaasut, paasissutissallu pineqartut eqqortuunerat nalornginarpat. Siunnersuummi imm. 1 naapertorlugu akerliliineq tusagassiummit immiunneqassasoq piumasarissallugu periarfissaq killilerneqarpoq, tusagassiuutikkut saqqummiunneqarsimassasut paasissutissat tigussaasut kisimik. Piumasaqaat pillugu paasissutissat tigussaasuussasut isumaqarpoq, naammagittaalliortoq akerliliinissamik piumasaqarsinnaanngitsoq allaaserisap imaluunniit aallakaatitap naliliineri imaluunniit isummersuutai tunngavigalugit. Ajoqusiinnaassuseqarnissamik piumasaqaat siunnersuutigineqarpoq suli tassaassasut aningaasaqarnikkut ajoqusiinerit imaluunniit allatut pingaarutilimmik ajoqusiinerit. Oqaaseqatigiiliornep erseqqissassavaa, ajoqusiinerit soqutaanginnerusutut taaneqarsinnaasut, akerliliinissamik pisinnaatitsinngitsut. Aaliangersakkap iluani ipportaaq, akerliliinissamik piumasaqaat malinneqassanngitsoq, paasissutissat saqqummiunneqartut eqqortuunerat nalornaappat. Taamaasilluni piumasaqaataavoq, saqqummiunneqartut eqqortuusimassanngitsut.

### Imm. 2-mut

Aaliangersakkami imm. 2-p naammagittaalliorsinnaasoq toqqarpaa taannaasoq, paasissutissat apeqqusernartut pisaat, taamatullu naammagittaalliorsinnaatitaasup

ilaqutai qaninnerpaat nangitsisinnaasut naammagittaalliorsinnaasup toqukkut qimaguttup pisinnaatitaaffianik. Qanigisaasutut taaneqartut tassaapput naammagittaalliorsinnaatitaasup katissimasaa, meerai, angajoqqaavi imaluunniit qatanngutai.

### Imm. 3

Siunnersuummi § 36, imm. 3-mi erseqqissarneqarpoq qisuariarnissamut periarfissat, tassa akerriliinissamut qinnuteqaat allakkatigut aqqissuisumut apuussimassasoq, paasissutissani tigussaasunik naqqiuteqarfigerusutanik saqqummiussinnermiit sap. akunneri sisamat qaangiutsinnagit.

### Imm. 4-mut

Aaliangersakkami imm. 4-p erseqqissarpaa, radiukkut tv-kkullu pilerisaarutitut aningaasalersuinernullu akerriliinerit suliarineqartassasut, radiumik tv-millu ingerlatsineq pillugu Inatsisartut pequssutaat naapertorlugu.

### *§ 37-mut*

Siunnersuutigineqarpoq akerriliinerup saqqummiunneqarnissaanut akisussaaffik tusagassiuutip pineqartup aqqissuisuaniissasoq, akerriliinissamillu qinnuteqaat tassunga apuunneqassasoq, ullumikkut aqqiineq atuuttoq assigalugu. Tamanna atuutissaaq apeqqutaatinnagu, inatsisissatut siunnersuutip imarisaa sinneri naapertorlugit, paasissutissamut akerriliiffiginiarneqartumut aqqissuisoq akisussaannersoq. Akerriliinissamut itigartitaaneq pillugu, siunnersuummi § 40 innersuussutigineqassaaq.

### *§ 38-mut*

Aaliangersakkap sammivai akerriliinerup imarisaa aammalu ilusaa.

### Imm. 1-imut

Siunnersuummi imm. 1-imi piunasaqaataavoq, akerriliineq naammagittaalliortumit imminermi ilusilerneqassasoq, aammalu aqqissuisoq pisussaannngitsoq naammagittaalliortoq ikiussallugu, taassuma naqqiummik ilusilersuinerani. Taassuma saniatigut erseqqissarneqarpoq, akerriliineq sapinngisamik puffaammerpalaartuussanngitsoq, taamalu akerriliineq unioqqutitsinertaqassanngitsoq.

### Imm. 2-mut

Imm. 2 naapertorlugu atuutereersutuut aqqissuisoq piunasaqarsinnaavoq, akerriliisup nammineq akerriliinini ilusilissagaa, aaliangersakkamulli piunasaqaataavoq, tusagassiuutip aamma nammineq akerriliissut ilusilersinnaagaa.

Pingaartumik tusagassiuut elektroniskiuppat naapertuutissaaq, tusagassiuut pingaarutilimmik akerliliinerup ilusaanut sunniuteqarsinnaaguni, tusagassiuutit elektroniskiusut immikkut ittumik paasiuminaassinnaaneri atortorissaaruteqarfiunerilu peqqutigalugit.

### § 39-mut

#### Imm. 1-imut

Ullumikkut atuuttut assigalugit, akerliliissut naammagittaalliortumut aningaasartuutaanngitsumik saqqummiunneqassaaq, tusagassiuutillu qanoq ittuunera apeqqutaalluni sapinngisamik piaartumik. Tamanna isumaqarpoq, soorlu atuagassiat naafferartumik saqqummersartut eqqarsaatigalugit, akerliliissut normumi siullermi ilanngunneqarsimassasoq imaluunniit ullormut saqqummersartut eqqarsaatigalugit, kingusinnerpaamik saqqummersumi tullermi, ilanngussinissamik piumasartaqarneraniit. Imm. 1-imi oqaaseqatigiiliat akerliliissutsip pisariaqanngitsumik kinguarsarnagu saqqummiunneqarnissaa pillugu, elektroniskiusumik tusagassiuutit qissimigaarneqarput, taamalu naapertuuttut isigineqarani siunnersuummi piffissalersuinissat.

Akerliissutip, pissutsit tunngavigalugit naammaginartumik piumasaaqatigineqarsinnaasoq tunngavigalugu, paasissutissat saqqummiunneqaaqarneranni akerliliinermullu aallaaviusuni saqqumisimatiginerisut ersaritsigisumik, saqqummiunneqarnissaa piumasarineqarpoq. Taamaattumik aaliangersakkamut naapertuuttuussanngilaq, akerliliissut soorlu ullormut saqqummersartup quppernerisa kingullersaanni annikitsumik ilanngunneqarpat, naak paasissutissat akerliliinermut aallaaviusut saqqaani allannerit angisuut atorlugit saqqummiunneqarsimaniartut. Aaliangersakkap siunertaatut isiginiarneqassaaq, akerliliissutip saqqummiunneqarnera illuatungaani lu paasissutissat eqqunngitsut saqqummiunneqarneri, imminnut oqimaaqatigiissasut.

#### Imm. 2-mut

Aaliangersakkami imm. 2-mi siunnersuutigineqarpoq, aaqqissuisuniit akerliliinermut atasumik ilanngussisinnaaneq killilerneqassasoq, peqqutigalugu akerliliinerup saqqummiunneqarnermini paasiuminaatsunngortinneqannginnissaa, taamalu paasissutissat tigussaasut allanngortinneqannginnissaat siunertaammat.

### § 40-mut

#### Imm. 1-imut

Siunnersuummi § 40, imm. 1-ikkut piumasaaqatigineqarpoq, akerliliinissamik qinnuteqaammut itigartitsineq, naammassisassat - ilaatigut naammagittaalliorsinnaanermut periarfissat - pillugit imaqassasoq. Itigartitsissutip Tusagassiuutit pillugit Aaliangiisartunut ingerlateqqinnissaanut piffissaliussaq

naatsorsorneqalersarpoq, aaqqissuisup akertilinissamut itigartitsissutaata naammagittaalliortumit tiguneqarneraniit.

#### Imm. 2-mut

Imm. 2-mi aaliangersakkami pineqarput, akertilinermik saqqummiineq naammagittaalliortup naliliinera naapertorlugu naammaginangikkaagat pisartut. Pisumi tassani siunnersuutigineqarpoq, amigartumik akertilinermik saqqummiineq pillugu naammagittaalliorneq, akertilinerup saqqummiunneqarneraniit kingusinnerpaamik sap. akunneri sisamat qaangiutsinnagit Tusagassiuutit pillugit Aaliangiisartunut apuunneqarsimassasoq. Aaliangersakkap iluani pineqarput akertilinerup saqqummiunneqarnera amigarineqarpat, aammalu § 39, imm. 1 aamma 2-mi malittarisassat eqqortinneqannginneri pillugit naammagittaalliutit, tassa akertiliiissut saqqummiunneqarpat, paasissutissat apeqqusernartut akertilinermut aallaaviusut saqqummiunneqarneranniit piffissaq siviisooq qaangiutereersooq, imaluunniit akertiliiissutsip inissinneqarnera naammagineqanngippat, paasissutissat akertilinermut aallaaviusut saqqummiunneqarnerannut sanilliullugu.

#### *§ 41-mut*

Aaliangersakkap pivaa Kalaallit Nunaanni Tusagassiuutit pillugit Aaliangiisartut ilaasortassaannik toqqaasarneq, pissusissamisoorinneqarlunilu siunissami Naalakkersuisut toqqaasalernissaat, ullumikkut aaqqiisimaneq taarserlugu, tassa Justitsministeriamiit toqqaasarneq atorunnaarsillugu. Toqqaasarnermut oqartussaaffiup allanngortinneqarnerata saniatigut, ullumikkut aaliangersakkatut atuuttut allanngortinneqanngillat.

#### Imm. 1-imut

§ 41, imm. 1-imi siunnersuutigineqarpoq, pioreersutuut siulittaasooq tullersortilu inatsisilerituujuussasut. Siunnersuutigineqarportaaq, Kalaallit Nunaanni Tusagassiortut Peqatigiiffianniit oqaaseqaateqartoqarnera tunngavigalugu ilaasortat marluk toqqarneqartassasut, taamalu ilaasortat marluk toqqarneqartassasut atuagassiat naqitat aammalu Kalaallit Nunaanni radiup aamma tv-p aaqqissuisoqarfiisa sinniisussaattut, taakku oqaaseqaataat aallaavigalugit, soorlu ullumikkut aaqqiineq taama ittoq. Kiisalu ilaasortat marluk pisortat sinniisaattut toqqarneqartassapput, piorsarsimassuseq aamma sunngiffimmi ingerlatsineq pillugu Inatsisartut peqqussutaanni kapitali 8 naapertorlugu, soqutigisaqaqatigiit taperneqarsinnaasut oqaaseqaataat aallaavigalugit, taannalu ullumikkut aaliangersakkanik atuutereersunik ingerlatitseqqiineruvoq. Taamaalillutik tusagassiuutit aallartitaqartinneqassapput aaqqissuisut tusagassiortullu amerlaqatigiittussanngorlugit.

#### Imm. 2-mut

Aaliangersakkami imm. 2-mi aaliangersarneqarpoq, ullumikkutut ilaasortaasinnaaneq ukiuni sisamanik sivisussuseqassasoq, taamalu

oqaatigineqassaaq Naalakkersuisut sinniisunik toqqaasassammata, imm. 1-imi periutsit taaneqartut atorlugit. Pineqartut oqaaseqaataat toqqaanissamut innersuussinertut isigineqassapput. Imm. 1-imi taaneqartut marluusut sinnerlugit innersuussisoqartillugu, Naalakkersuisut aaliangertassavaat, sorliit toqqarneqassanersut. Kingulleq isumaqarpoq, soorlu Kalaallit Nunaanni Tusagassiortut Peqatigiiffiata inuit pingasut innersuussutigippagit, taava Naalakkersuisut kiffaanngissuseqarlutik pingasuusut akornannit toqqaasinnaapput, taamatullu aaqqissuisoqarfiit siuttuiniit , aammalu soqutigisaqatigiit piorsarsimassuseq aamma sunngiffimmi ingerlatsineq pillugu Inatsisartut peqqussutaanni kapitali 8 naapertorlugu taperneqarsinnaasut eqqarsaatigalugit.

Tassunga atasumik siunnersuutigineqarpoq, ullumikkut Tusagassiorneq pillugu Suleqatigiissitaq ingerlaannassasoq, nutaamik inuttaliinissaq tikitserlugu, tak. § 55, pkt. 2.

#### *§ 42-mut*

Aaliangersakkap erseqqissarpaa, suleqatigiissitap suliaqarnermini qanoq katitigaanissaa. Oqaatigineqassaaq, malittarisassatigut mattunneqanngimmat Tusagassiornermut Suleqatigiissitaq marlunnik sisamanik inuttalikkamik immikkoortortaqaarsinnaanera, naammagittaalliutit suliarineqartut amerlassusaasa pisariaqartilissappassuk. Tassuunakkut anguniarneqarpoq, suliat sukkasuumik isumagineqarsinnaanissaat, tamannalu kissaatiginartuuvoq naammagittaalliutit qanoq ittuunerat eqqarsaatigalugit.

#### *§ 43-mut*

Siunnersuummi § 43, imm. 1-ip Tusagassiuutit pillugit Aaliangiisartut oqartussaaffigisaat aaliangersarpai. Tusagassiuutit pillugit Aaliangiisartut tusagassiuutit tusagassiornermi ileqqorissaarnissamik piumasaqaatinik saneqqutaarineri, tak. § 34, pillugit naammagittaalliutit aaliangiiffigissavai, aammalu tusagassiuutit akerliliinissamik itigartitsitsineri aaliangiiffigissallugit, imaluunniit amigartumik akerliliinermik saqqummiineri aaliangiiffigissallugit, tak. § 40. Pisut ilaanni Tusagassiuutit pillugit Aaliangiisartut taamaallaat aaliangiisinnaatitaapput, naammagittaaliortup tusagassiuut pineqartoq saaffigeqqaarsimagaluarpagu, uani tamanut piumasaqaatinik KNR-ip unioqqutitsinera pineqarluni, tak. § 34, imm. 3 aamma § 40 - akerliliinerup tusagassiuutikkut saqqummiunnissaanik qinnuteqaatip itigartinneqarneranut tunngasut. Nunap iluani atuagassiap naafferartumik saqqummersartup, KNR-ip avataatigut radiumik tv-millu ingerlatsiviup, imaluunniit inatsisissatut siunnersuummi § 1, nr. 3-mi taaneqartut tusagassiuutit arlaata, tusagassiornermi ileqqorissaarnissamik piumasaqaatinik unioqqutitsinera pillugu naammagittaalliutit, suleqatigiissitamit isumagineqarsinnaapput, naammagittaaliortoq tusagassiuutip aaqqissuisuanut siullertut saaffigineqqaarsimannikkaluartoq, tak. § 34, imm. 2, tassungalu oqaasertat.

Tassunga atasumik oqaatigineqassaaq, Tusagassiuutit pillugit Aaliangiisartut § 43, imm. 1, nr. 1 aamma 2 napertorlugit aaliangigaat, allaffissornikkut oqartussaasumut allamut ingerlateqqissinnaanngimmata, kisiannili eqqartuussivinnut tunniunneqarsinnaallutik, tak. siunnersuummi § 50, ullumikkut aaliangersakkatut ittoq.

#### Imm. 2-mut

Imm. 2-mi aaliangersakkap Tusagassiuutit pillugit Aaliangiisartut siulittaasuat pisinnaatippaa, naammagittaalliutit pisuni arlaqartuni itigartissinnaassagai; aaqqiineq siunnersuutigineqartoq ataatsimut isigalugu, ullumikkut Tusagassiuutit pillugit Aaliangiisartut pillugit aaqqiinermut assingummat. Siulittaasup naammagittaalliutit utertissinnaavai, takuneqarsinnaappat naammagittaalliut Tusagassiuutit pillugit Aaliangiisartut oqartussaaffiisa avataanniittoq, tak. imm. 1, imaluunniit takuneqarsinnaasumik tunngavissaqanngippata. Aammattaaq siulittaasup inunnit, suliffeqarfinit ilaalu ilanngullugit. naammagittaalliutit utertissinnaavai, naammagittaalliutigineqartup imarisamigut aaliangersakkanut soqutiginaateqanngippat. Tamanna pisinnaavoq soorlu tigussaasumik paasissutissat pillugit naak inummut tassunga tunngassuteqanngikkaluartut inuup akerliliiinermik ilanngussinissaminut itigartitaanini naammagittaalliutigippagu, tak. § 36, imm. 2. § 34-mi saniatigut aaliangersakkap unioqqutinneqarnera pillugu naammagittaalliut, inummit imaluunniit suliffeqarfimmit ilaalu ilanngullugit innarligeanngitsumiillu aallaaveqarpat, naammagittaalliut itigartinneqarsinnaassaaq imaluunniit Tusagassiuutit pillugit Aaliangiisartut suliassatut tigusinnaavaat, pisup nalinginnaasumik innuttaasunut soqutiginaateqarnera pequtugalugu, soorluttaaq Tusagassiuutit pillugit Aaliangiisartut namminneq piumassusertik atorlugu pisoq taama ittoq suliassamissut tigusinnaagaat, tak. § 44, imm. 2 tassungalu aaliangersakkamut oqaasertat.

#### Imm. 3-mut

Imm. 3-mi aaliangersakkap naammagittaalliornissamut piffissaliussat § 34, imm. 2 aamma imm. 3-miittut, aammalu § 40-miittut innersuuppai nassatarissallugulu siulittaasup piffissaliussat eqqaaneqartut qaangerneqaraanagata sulissat itigartissammagit.

#### *§ 44-mut*

#### Imm. 1-imut

Imm. 1 naapertorlugu, Tusagassiuutit pillugit Aaliangiisartut taamaallaat suliarissavaat allakkatigut naammagittaalliutit, ullumikkut soorlu taama aaliangersagaqartoq. Tassuunakkut piumasaqaataavoq, naammagittaalliutit tunniunnerani, naammagittaalliortup kinaassusaa paasissutissiisutigineqassasoq. Allaffissornikkut ingerlatsivinni nalinginnaasumik aaliangersakkat tunngaviusut naapertorlugit, Tusagassiuutit pillugit Aaliangiisartut pisussaannngillat, suliat atertaqartinneqanngitsut suliarissallugit, taamaattoq tak. imm 2.



### Imm. 2-mut

Imm. 2-mi aaliangersakkap Tusagassiuutit pillugit Aaliangiisartut nammineq piumassusertik atorlugu sulianik qaqitsisinnaanerannik pisinnaatippai, apeqqutit pingaaruteqarpata imaluunniit tunngaviusumik pingaaruteqarpata. Pissusiviusut naapertorlugit suliarineqarsinnaasutuaapput, tusagassiornermi ileqqoreqqusaq pillugu saniatigut aaliangersaanermut unioqqutitsinerit, aammalu innarlerneqartoq naamagittaalliuteqarsimangippat, imaluunniit toqqaannartumik innarlerneqartumik tikkuaasoqarsinnaangippat. Innarlerneqartumik tikkuaasoqarsinnaappat, suleqatigiissitaq innarligaasumit oqaaseqaammik piniassaaq. Piumasarineqarportaaq, innarligaasup aqqa taamaallaat oqaatigineqarsinnaasoq, tamatumunnga akuersisoqarsimappat aatsaat.

### *§ 45-mut*

### Imm. 1-imut

Aaliangersakkami imm. 1-imi siunnersuutigineqarput Tusagassiuutit pillugit Aaliangiisartut sulinerminni najoqqutassaat. Pisortatigut sulianik ingerlatsineq pillugu inatsimmi tusarniaanerit pillugit malittarisassat naapertorlugit, aaliangersakkap siunertaraa qulakkiissallugu, naammagittaalliummi tusagassiuutip pineqartup suliamik ilisimanninnissaminut periarfissinneqarnissaa aammalu paasissutissat tunngaviusut oqaaseqarfiginissaat, suliap aaliangiivigineqannginnerani. Aaliangersagaq naapertuuppoq ullumikkut Tusagassiuutit pillugit Aaliangiisartut pillugit aaliangersakkanut.

### Imm. 2-mut

Imm. 2-mi aaliangersagaq § 7-imut taputartuunneqassaaq, taanna naapertorlugu aaqqissuisup qulakkeersimasussaavaa radiukku tv-kkullu aallakaatitat tamarmik nuutinernerinik qaammatini pingasuni toqqortaqaarnissaaq. Piffissaliussaq tamanna atorunnaassaaq, naammagittaalliornissamut piffissaliussaq qaangiutsinnagu Tusagassiuutit pillugit Aaliangiisartunut naammagittaalliortoqarpat, tak. siunnersuummi § 7, imm. 2. Imm. 2 naapertorlugu aaliangiisartut piumasaqaataanik eqqortitsinnginneq kinguneqartitsiviussanngilaq, eqqaassanngikkaanni eqqortitsinnginneq peqqutigalugu suliap ingerlanneqarnerata ajoquserneqarsinnaanera. Kinguneqartitsiviunnginneranut peqquataavoq, aaliangiisartut eqqartuussivittut oqartussaassuseqanngimmata, sukumiinerusumik tak. § 49-mut oqaasertat.

### *§ 46-mut*

Siunnersuummi § 46, imm. 1-imiit 3-mut taasat qulakiissavaat, Tusagassiuutit pillugit Aaliangiisartut sapinngisamik pilertornerpaamik suliat isumagissagaat. Tusagassiuutip suliaq taamaalilluni kinguarsarsinnaanngilaa, aaliangiisartunit saaffiginnissutit akinaveersaarnerigut. Taamaalilluni illuatungeriit arlaat

ajouserneqarsinnaavortaaq, oqaatsit atorlugit isumaqatiginiarnissamut aggersaanerit qisuariarfigineqanngippata.

Imm. 3 naapertorlugu illuatungeriit oqaatsit atorlugit isumaqatiginninniarnissamut aggersarneqarsinnaaneritik periarfissaq imaanngilaq, Tusagassiuutit pillugit Aaliangiisartut uppernarsaatinik ujaasivigissagaat, aaliangersagarli atorneqarsinnaavoq, Tusagassiuutit pillugit Aaliangiisartut isumaat naapertorlugu suliap allakkatigut qulaajarneqarnera amigarineqarpat, imaluunniit isumaqatigiinnikkut aaqqiisoqarsinnaanera periarfissaappat.

#### *§ 47-mut*

§ 41, imm. 1 naapertorlugu Tusagassiuutit pillugit Aaliangiisartut katitigaanerisa, nunallu isorartunerata, inuttussutsinullu tunngasut peqqutigalugit pisinnaavoq, tusagassiuut naammagittaalliummi pineqartoq, ilaasortat ilaannit attuumassuteqarfigineqartoq. Pisuni taama ittuni siunnersuutigineqarpoq, ilaasortaq suliamut attuumassuteqarpallaarnini peqqutigalugu peqataassanngitsoq. Aaliangersagaq naapertorlugu aamma suliamut attuumassuteqarpallaartoqarpoq, ilaasortap suliamut immikkut soqutigisaqannginnera nalornginartoqartinneqarpat. Assersuutigalugu imaassinnaavoq, ilaasortaq suliamut tunniunneqartumut suliarineqartumulluunniit atasumik avammut isummersorsimasoq. Malittarisassaq eqqartuussiveqarnermi malittarisassanut atuuttunut naleqquppoq, soorlu pisortatigut sulianik ingerlatsineq pillugu Inatsisartut inatsisaanni taaneqartumi suliamut attuumassuteqarpallaarneq pillugu nalinginnaasumik periuseq malittaralugu.

#### *§ 48-mut*

Siunnersuummi § 42-p malitsigimmagu Tusagassiuutit pillugit Aaliangiisartut naammagittaalliut pillugu aaliangiiniarnerminni minnerpaamik sisamaasussaananerit, siunnersuutigineqarpoq siulittaasup taasinera aaliangiisuussasoq, taasinermi naligiittoqarpat. Aaliangerneq isumaqatigiinngissutaappat, isumaqatigiinngissut tunngavilersugaq aaliangernermut ilanngunneqassaaq. Tassani piumasaqaataavoq, ilaasortat isumaqatigiinngitsut kikkuuneri allanneqassasoq.

#### *§ 49-mut*

Malittarisassaq Tusagassiuutit pillugit Aaliangiisartunik pisinnaatitsivoq aaliangiinissaannut, aaliangernerup saqqummiunneqarnissaa pillugu apeqqummut, tamatumalu qanoq sukumiitiginissaa pillugu. Aaliangersakkap ataani ipput tusagassiornermi ileqqorissaarnissamik unioqqutitsinerit, tak. siunnersuummi § 34, kiisalu tusagassiuummut peqqusisinnaaneq, akerliliinerup avammut saqqummiunnissaanik, tak. siunnersuummi § 40. Tusagassiuutit pillugit Aaliangiisartut tusagassiuut naammagittaalliutigineqartoq peqquppagu aaliangerneq saqqummiutissagaa, tusagassiuut pineqartoq pisussaavoq peqqussut naalassallugu, taannalu saqqummiunneqassaaq oqaasertalersorneqarani, imalu saqqumitigissalluni

naapertuuttumik piumasarineqarsinnaasut tunngavigalugit. Tusagassiuutip aaliangerneq saqqummiutinngippagu, pineqaatissiisoqarsinnaavoq siunnersuummi § 53 naapertorlugu, taamalu akiligassiisoqarsinnaalluni eqqartuussiveqarneq pillugu inatsit naapertorlugu.

Tassunga atasumik erseqqissarneqassaaq siunertaanngimmat Tusagassiuutit pillugit Aaliangiisartut eqqartuussivittut pineqaatissiisinnaanissaat imaluunniit taarsiussanngortitsisinaanissaat, suliani aaliangiisartunut apuunneqartuni. Uppernarsaanissamik apeqqutit saniatigut isiginiarneqassaaq, kingusinnerusukkut ingerlaqataanilluunniit eqqartuussiviit aqqtigalugit suliasanngortitsisoqarsinnaammat, sukkanerusumik akeqanngitsumillu suleqatigiissitamit aaliangiisitsisinnaanerup qaavatigut, tassami Tusagassiuutit pillugit Aaliangiisartut siornatigutulli tusagassiuut pineqartoq pillugu naammagisimaarinninnertik oqaatigisinnaavaat. Siunnersuutigineqartutuut aaqqiineq ullumikkut aamma atuutereersoq malitseqarpoq, Tusagassiuutit pillugit Aaliangiisartut tusagassiuut naammagittaalliutigineqartoq peqqusinnaammasuk, Tusagassiuutit pillugit Aaliangiisartut aaliangernerat piaarnerpaamik saqqummiutissagaa, suliani naammagittaalliortoq tamakkiisumik ilaannakortumilluunniit isumaqatigineqarpat. Taamaallitutik naammagittaalliuteqartut utaqqiisaasumik, akuttunngitsumillu immini naammagisimaarnartumik ammasumik atikkut salinneqarnerat pisinnaavoq, tusagassiuutip tungaanit innarliinerit eqqarsaatigalugit. Aammalu eqqartuussivittut Tusagassiuutit pillugit Aaliangiisartunik oqartussaatisinnginnermut peqputaavoq, apeqqutit inatsisitigut sillimaniarnermut tunngasut, tassami taarsiinissamut tunngaviit naammattut pigineqarnerisut aammalu taarsiinermi annertussusiliinerit, nalinginnaasumik eqqartuussivinnit ingerlanneqartarput, piumasagaataakkajullunilu sukumiisumik uppernarsaateqartoqarnissaa, eqqartuussivinni taamaallaat naammassineqarsinnaasumik. Aaqqiineq atuutereersunut assinguvoq.

#### *§ 50-imut*

Maanna suleqatigiissitamut ullumikkut atuuttut assigalugit, aammalumi Radio tv-lu pillugit suleqatigiissitamut ullumikkut atuuttut, radiumik tv-millu ingerlatsineq pillugu Inatsisartut peqqussutaanni § 47 naapertorlugu siunnersuutigineqarpoq, Tusagassiuutit pillugit Aaliangiisartut aaliangiineri allaffissornikkut ingerlatsivimmut allamut ingerlateqqinneqarsinnaanngitsut. Akerlianilli akerliliinermi sulianut tunngasuni tusagassiornermilu ileqqorissarneq pillugu suliani Tusagassiuutit pillugit Aaliangiisartut naliliineri, eqqartuussivinnut tunniunneqarsinnaapput, tak. inatsisit Tunngaviusut § 63. Akornutissaqanngilaq Tusagassiuutit pillugit Aaliangiisartunut suliasanngortitsiutigaluni eqqartuussivinnut tunniussisoqarnissaa. Tusagassiuut pillugu aaliangiinerup eqqartuussivinnut ingerlateqqinneqarnera isumaqanngilaq, aaliangerneq kinguartinneqassasoq, avammut saqqummiussinissamik peqqusineq imaluunniit akerliliinerup saqqummersinneqarnissaannik peqqusineq eqqarsaatigalugit.

#### *§ 51-imut*

Aaqqiineq pioreersumut assinguvoq, taamaalilluni nalunaarusiaq ilusilerneqassalluni suliat ataasiakkaat imaqarniliornerannik imaqarluni. Tusagassiuutillu tusagassiornermi ileqqorissaarnissaanik piumasaqaatinik unioqqutitsinera pillugit aaliangiinikkut uparuaatit, aammalu innuttaasunut nalinginnaasumik soqutiginaatillit, naalisarnagit nalunaarusiarineqassapput.

#### *§ 52-imut*

##### Imm. 1-imut

Siunnersuutigineqarpoq, siunissami Naalakkersuisut taakkuusut, Tusagassiuutit pillugit Aaliangiisartut suleriaasissaanik aaliangersaasussat, taakkununga isumaqatiginniuteqareernerit aallaavigalugit.

##### Imm. 2 aamma 3-mut

Siunnersuutigineqarpoq, siunissami Naalakkersuisut aaliangiissagaat, Tusagassiuutit pillugit Aaliangiisartut sulineranut atasumik aningaasartuutit, ilanngullugit Tusagassiuutit pillugit Aaliangiisartut allatseqarfeqarneranut aningaasartuutit, suleqatigiissitap suleriaasissaatut aaliangersaaneq naapertorlugu tusagassiuutinut pineqartunut agguakkamik akilersinneqartassanersut.

#### *§ 53-imut*

Aaliangersakkap imaraa, tusagassiornermi akisussaassuseqarneq pillugu inatsimmik unioqqutitsinerit arlaqartut, kiisalu eqqartuussinermi aaliangikkanik saqqummiusseqqusinermi peqqusinernik eqqortitsinnginnerit, imaluunniit Tusagassiuutit pillugit Aaliangiisartut aaliangigaannik ilaalu ilanngullugit eqqortitsinnginnerit akiligassiinermik kinguneqartitsivigineqarsinnaasut. Tassunga atasumik oqaatigineqassaaq, aaliangersagaq tunngavigallugu kinguneqartitsivigineqarnissamik aaliangiinerit, eqqartuussivinnit ingerlanneqassasut.

#### *§ 54-imut*

Aaliangersagakkut pisinnaatitsisoqarpoq, tusagassiuutip imarisaa pequtigalugu kinguneqartitsiviginninnissamik aaliangiinerni, eqqartuussiviit aaliangersinnaagaat eqqartuussissutip tusagassiuutikkut pineqartukku erngertumik saqqummiunneqarnissaa. Aaliangersaaneq assinguvoq Tusagassiuutit pillugit Aaliangiisartut piumasaqarsinnaanerit, suleqatigiissitap aaliangernerinik saqqummiussisoqarnissaanik, siunnersuummi § 49 naapertorlugu.

#### *§ 55-imut*

Siunnersuutigineqarpoq, inatsisissatut siunnersuut 1. juli 2007  
atortuulersinneqassasoq, taamalu danskit tusagassiornermi akisussaassuseqarnej  
pillugu inatsisaat, ullumikkut atortuutinneqartup atorunnaarsinneqarnissaa.

*§ 56-imut*

Siunnersuutigineqarpoq, ullumikkut Tusagassiuutit pillugit Aaliangiisartunut  
naammagittaalliutaasimasinnaasut, una Inatsisartut inatsisaat naapertorlugu  
suleqatigiissitap ilaasortaatut toqqakkat suliarissagaat, inatsit atuuttoq  
tunnngavigalugu, tassaassallunilu piffissami tassani paasissutissat  
naammagittaalliornermut aallaaviusut saqqummiunneqarfiisa nalaani inatsit atuuttoq.

---

Ilanngussaq: Tusagassiornermi ileqqorissaarnissamut innersuussutit